

**BOSNA I HERCEGOVINA
FEDERACIJA BOSNE I HERCEGOVINE
Tuzlanski kanton
GRAD TUZLA
GRADSKO VIJEĆE**

S T E N O G R A M

**SA TRIDESETŠESTE SJEDNICE GRADSKOG VIJEĆA TUZLA ODRŽANE
28. FEBRUARA 2024. GODINE U POSLOVNOM OBJEKTU „GRAFIČAR“ SA
POČETKOM U 10,00 SATI.**

- SJEDNICI PRISUSTVUJE 30 VIJEĆNIKA.

U Tuzli, februar 2024. godine

NATAŠA PERIĆ – predsjedavajući Gradskog vijeća Tuzla

Pozivam vijećnike da zauzmu svoja mjesta. Počinjemo sa radom.

(Intoniranje himne Bosne i Hercegovine.) Poštovani vijećnici Gradskog vijeća Tuzla, obrađivači materijala, predstavnici medija, gosti, otvaram 36. redovnu sjednicu Gradskog vijeća Tuzla.

Konstatujem da prema evidenciji Stručne službe Gradskog vijeća, sjednici prisustvuje 28 od ukupnog broja vijećnika, što je dovoljno za punovažan rad i odlučivanje. Za današnju sjednicu svoj izostanak je najavio vijećnik Nedžad Jusić. Predlažem da mu opravdamo izostanak, a za današnju sjednicu kašnjenje su najavili vijećnici Šefik Husić i Admir Hasanbašić. Gradonačelnik Grada Tuzle, doktor Zijad Lugavić me obavijestio da zbog ranije preuzetih obaveza i odlaska na službeni put, nije u mogućnosti prisustvovati današnjoj sjednici Gradskog vijeća.

Poslovnička. Vijećnica Esana Kavazbašić Huskanović. Izvolite.

ESANA KAVAZBAŠIĆ HUSKANOVIĆ – vijećnik Platforme za progres

Pa, ovaj, ja sam tražila dopunu tačke dnevnog reda, znači, iz jednog prostog razloga. Prvo želim vas sve pozdravit. Vijećnike, vijećnice, predsjedavajuća, dopredsjedavajuća. Loše sam krenula.

Dugo sam razmišljala kako da vam se obratim u vezi sve učes... (NATAŠA PERIĆ – Esana). Molim. (NATAŠA PERIĆ – Izvinite što vas prekidam. Mi smo se dogovorili sad za minutu šutnje, a ovo ćete kad bude prijedlog). Važi. Može. (NATAŠA PERIĆ – Izvnite, samo da...). Ja tražim samo minutu šutnje za Amru Kahrmanović.

(Minut šutnje).

NATAŠA PERIĆ

Vječni mir imala.

Podsjećam vijećnike da su, uz materijale za današnju sjednicu, dobili i Zapisnik, a svaki klub vijećnika i stenogram sa 35. redovne sjednice Gradskog vijeća Tuzla, održane 31. januara 2024. godine.

Da li ima primjedbi na Zapisnik sa 35. redovne sjednice?

Ako ne, ko je? Stavljam na izjašnjavanje skraćenu verziju Zapisnika sa 35. redovne sjednice. Molim vijećnike da se izjasne.

Glasanje je okončano.

Konstatujem da je skraćena verzija Zapisnika sa 35. redovne sjednice Gradskog vijeća Tuzla, održane 31.01.2024. usvojena sa,

26 glasova za, nije bilo protiv i nije bilo suzdržanih.

Vijećnica Esana Kavazbašić Huskanović ispred Kluba vijećnika Platforme za progres je u poslovničkom roku dostavila prijedlog da se u dnevni red 36. redovne sjednice Gradskog vijeća Tuzla dopuni tačkom pod nazivom OSUDA MONSTRUOZNOG UBISTVA AMRE KAHRIMANOVIĆ, UZ PREPORUKU VLADI I SKUPŠTINI TUZLANSKOG KANTONA I DRUGIM NADLEŽNIM ORGANIMA ZA SANKCIONISANJE ODGOVORNIH I PODUZIMANJE HITNIH PREVENTIVNIH MJERA ZA KADROVSKO I TEHNIČKO JAČANJE MINISTARSTVA UNUTRAŠNJIH POSLOVA TUZLANSKOG KANTONA, S CILJEM ZAŠTITE GRAĐANA.

Prijedlog vijećnice Esane Kavazbašić Huskanović ste dobili elektronski, kao i u materijalu podijeljenom pred početak sjednice.

Evo, pozivam vijećnicu Kavazbašić Huskanović da, ispred Kluba vijećnika Platforme za progres, ukoliko želi, obrazloži svoj prijedlog. Izvolite Esana.

ESANA KAVAZBAŠIĆ HUSKANOVIĆ

Poštovani vijećnici i vijećnice, predsjedavajuća i dopredsjedavajući.

Dugo sam razmišljala kako da vam se obratim u vezi ovih svih učestalijih slučajeva femicida.

Ne želim suditi nikome. Nemam prava na to. Al ono što me uplašilo nakon ubistva Amre Kahrیمانović je tišina koja je nastupila nakon ove zvjerske likvidacije, smatram kao neko ko je u službi građana, što ovo Vijeće jeste, svojom tišinom ne smijemo dozvoliti sebi da stanemo na stranu ubice. Nemojte ovo shvatit kao napad, već poziv na savjest.

Molim vas, ako ništa iz poštovanja prema porodici žrtvi, da omogućimo diskusiju. Svaki drugi izbor će nas stavit na pogrešnu stranu historije.

Napad na policajca kao službenu osobu je atak na državu. A kako nazvati atak policajca na nevinog građana? To je to. Hvala.

NATAŠA PERIĆ

U redu. Hvala vam Esana.

Sada stavljam na izjašnjavanje prijedlog vijećnice Esane Kavazbašić Huskanović da se u dnevni red 36. redovne sjednice Gradskog vijeća Tuzla dopuni tačkom pod nazivom OSUDA MONSTRUOZNOG UBISTVA AMRE KAHRIMANOVIĆ, UZ PREPORUKU VLADI I SKUPŠTINI TUZLANSKOG KANTONA I DRUGIM NADLEŽNIM ORGANIMA ZA SANKCIONISANJE ODGOVORNIH I PODUZIMANJE HITNIH PREVENTIVNIH MJERA ZA KADROVSKO I TEHNIČKO JAČANJE MUP-a TUZLANSKOG KANTONA, S CILJEM ZAŠTITE GRAĐANA, te imajući u vidu da je Poslovníkom Gradskog vijeća Tuzla propisano da se vijećnička pitanja i inicijative razmatraju kao prva tačka dnevnog reda, predlažem da se ova tačka razmatra kao tačka dva dnevnog reda, a da se ostale tačke redosljedom pomjere.

Molim vijećnike da se izjasne.

Glasanje je okončano.

Konstatujem da je prijedlog Esane Kavazbašić Huskanović ispred Kluba vijećnika Platforme za progres, da se u dnevni red 36. redovne sjednice Gradskog vijeća Tuzla dopuni tačkom pod nazivom: OSUDA MONSTRUOZNOG UBISTVA AMRE KAHRIMANOVIĆ, UZ PREPORUKU VLADI I SKUPŠTINI TUZLANSKOG KANTONA I DRUGIM NADLEŽNIM ORGANIMA ZA SANKCIONISANJE ODGOVORNIH I PODUZIMANJE HITNIH PREVENTIVNIH MJERA ZA KADROVSKO I TEHNIČKO JAČANJE MUP-a TUZLANSKOG KANTONA, S CILJEM ZAŠTITE GRAĐANA, kao i prijedlog da se ova tačka razmatra kao tačka dva dnevnog reda, a da se ostale tačke redosljedom pomjere, usvojene sa,

26 glasova za, nije bilo protiv i nije bilo suzdržanih.

Sada stavljam na izjašnjavanje Dnevni red u cjelini i pozivam vijećnike da aktiviraju svoje uređaje i da se izjasne.

Glasanje je okončano.

Konstatujem da je Dnevni red u cjelini usvojen sa,

26 glasova za, nije bilo protiv i nije bilo suzdržanih.

DNEVNI RED

- Usvajanje Skraćene verzije zapisnika sa 35. redovne sjednice Gradskog vijeća Tuzla, održane 31.1.2024. godine

1. VIJEĆNIČKA PITANJA I INICIJATIVE

2. OSUDA MONSTRUOZNOG UBISTVA AMRE KAHRIMANOVIĆ, UZ PREPORUKU VLADI I SKUPŠTINI TUZLANSKOG KANTONA I DRUGIM NADLEŽNIM ORGANIMA ZA SANKCIONISANJE ODGOVORNIH I PODUZIMANJE HITNIH PREVENTIVNIH MJERA ZA KADROVSKO I TEHNIČKO JAČANJE MUP-A TUZLANSKOG KANTONA, S CILJEM ZAŠTITE GRAĐANA

3. RAZMATRANJE I USVAJANJE ODLUKE O PRISTUPANJU IZRADI URBANISTIČKOG PROJEKTA DIJELA PROSTORNE CJELINE „STARI GRAD“, „TABAŠNICE - ATIK MAHALA“ U TUZLI

4. RAZMATRANJE I USVAJANJE ODLUKE O PRISTUPANJU IZRADI REGULACIONOG PLANA PROSTORNE CJELINE „TOPOLICA“ U TUZLI

5. RAZMATRANJE I USVAJANJE :

a) DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“

b) ODLUKE O PROVOĐENJU DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“

c) ODLUKE O IZMJENAMA I DOPUNAMA ODLUKE O PROVOĐENJU IZMJENE REGULACIONOG PLANA PROSTORNE CJELINE „STUPINE“ U TUZLI

d) ODLUKE O USVAJANJU DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“

6. RAZMATRANJE I USVAJANJE:

a) ODLUKE O RASPISIVANJU JAVNOG OGLASA ZA IZBOR I IMENOVANJE PREDSJEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“ TUZLA – DEVELOPMENT AGENCY „TRAG“ TUZLA, ČIJI JE OSNIVAČ GRAD TUZLA (SA TEKSTOM JAVNOG OGLASA)

b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE PREDSJEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“ TUZLA - DEVELOPMENT AGENCY „TRAG“ TUZLA, ČIJI JE OSNIVAČ GRAD TUZLA

c) RJEŠENJA O IMENOVANJU KOMISIJE ZA IZBOR PREDSJEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“ TUZLA - DEVELOPMENT AGENCY „TRAG“ TUZLA ČIJI JE OSNIVAČ GRAD TUZLA

7. RAZMATRANJE I USVAJANJE:

a) RJEŠENJA O RAZRJEŠENJU PREDSJEDNIKA UPRAVNOG ODBORA - PREDSTAVNIKA OSNIVAČA JAVNE ZDRAVSTVENO - NASTAVNE USTANOVE DOM ZDRAVLJA „DR. MUSTAFA ŠEHOVIĆ“ TUZLA

b) ODLUKE O RASPISIVANJU JAVNOG OGLASA ZA IZBOR I IMENOVANJE PREDSJEDNIKA UPRAVNOG ODBORA - PREDSTAVNIKA OSNIVAČA U JAVNOJ ZDRAVSTVENO - NASTAVNOJ USTANOVI DOM

ZDRAVLJA „DR. MUSTAFA ŠEHOVIĆ” TUZLA, ČIJI JE OSNIVAČ GRAD TUZLA (SA TEKSTOM JAVNOG OGLASA)

c) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE PREDSEDNIKA UPRAVNOG ODBORA - PREDSTAVNIKA OSNIVAČA JAVNE ZDRAVSTVENO-NASTAVNE USTANOVE DOM ZDRAVLJA „DR. MUSTAFA ŠEHOVIĆ” TUZLA, ČIJI JE OSNIVAČ GRAD TUZLA

d) RJEŠENJA O IMENOVANJU KOMISIJE ZA IZBOR PREDSEDNIKA UPRAVNOG ODBORA- PREDSTAVNIKA OSNIVAČA U JAVNOJ ZDRAVSTVENO - NASTAVNOJ USTANOVI DOM ZDRAVLJA „DR. MUSTAFA ŠEHOVIĆ” TUZLA, ČIJI JE OSNIVAČ GRAD TUZLA

8. RAZMATRANJE I USVAJANJE:

a) ODLUKE O RASPISIVANJU JAVNOG OGLASA ZA IZBOR I IMENOVANJE ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA (SA TEKSTOM JAVNOG OGLASA)

b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA

c) RJEŠENJA O IMENOVANJU KOMISIJE ZA IZBOR ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA

9. RAZMATRANJE I USVAJANJE:

a) ODLUKE O DODJELI U ZAKUP POSLOVNIH PROSTORIJA NEPOSREDNOM POGODBOM JU TUZLANSKA RAZVOJNA AGENCIJA “TRAG” TUZLA – DEVELOPMENT AGENCY “TRAG” TUZLA

b) ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA VELLAS DOO SREBRENİK

c) ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA CRVENI KRIŽ/KRST GRADA TUZLA

d) ODLUKE O RASPISIVANJU JAVNOG OGLASA O DAVANJU U ZAKUP POSLOVNIH PROSTORIJA

10. RAZMATRANJE I USVAJANJE IMOVINSKO-PRAVNIH AKATA:

a) ODLUKA O UTVRĐIVANJU JAVNOG INTERESA ZA IZGRADNJU TRANSFORMATORSKE STANICE KSF6 10(20)/0,4 KV „PLAVA POLIKLINIKA“ SA PRIKLJUČNIM 10 (20) KV KABLOM U NASELJU SLAVINOVIĆI U TUZLI

b) ODLUKA O POVJERAVANJU NEKRETNINA U VLASNIŠTVU GRADA TUZLA NA UPRAVLJANJE I KORIŠTENJE JAVNOM KOMUNALNOM PREDUZEĆU „SAOBRAĆAJ I KOMUNIKACIJE – TUZLA“ D.O.O. TUZLA

c) ODLUKA O PRODAJI NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA

d) RJEŠENJE O IMENOVANJU KOMISIJE ZA PROVOĐENJE POSTUPKA PREGOVARANJA ZA PRODAJU NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA

e) ODLUKA O OPTEREĆENJU ZEMLJIŠTA PRAVOM GRAĐENJA NA LOKALITETU POSLOVNE ZONE „KREKA SJEVER“ U TUZLI PUTEM JAVNOG NADMETANJA – LICITACIJE (S TEKSTOM JAVNOG OGLASA)

f) RJEŠENJE O IMENOVANJU KOMISIJE ZA PROVOĐENJE JAVNOG OGLASA O OPTEREĆENJU ZEMLJIŠTA PRAVOM GRAĐENJA NA

LOKALITETU POSLOVNE ZONE „KREKA SJEVER“ U TUZLI PUTEM JAVNOG NADMETANJA – LICITACIJE

11. RAZMATRANJE IZVJEŠTAJA O RJEŠAVANJU UPRAVNIH STVARI U UPRAVNOM POSTUPKU GRADA TUZLE ZA 2023. GODINU

12. RAZMATRANJE I DONOŠENJE RJEŠENJA O IZMJENI RJEŠENJA O IMENOVANJU KOORDINACIJSKE RADNE GRUPE ZA IZRADU PROGRAMA KAPITALNIH INVESTICIJA GRADA TUZLA

13. RAZMATRANJE INICIJATIVE ZA DONOŠENJE DEKLARACIJE O OSUDI NASILJA U GAZI

14. RAZMATRANJE IZVJEŠTAJA KOMISIJE ZA IZBOR I IMENOVANJA

15. TEKUĆA PITANJA

a) Obavještenje Službe za prostorno uređenje i zaštitu okoline o razlozima prolongiranja izrade Izvještaja o stanju u prostoru.

Prelazimo na prvu tačku:

VIJEĆNIČKA PITANJA

Vijećnik Senad Mehmedinović.

SENAD MEHMEDINOVIĆ – vijećnik Pokreta demokratske akcije

E hvala. Imam dva pitanja kratka.

Službi za komunalne poslove, izgradnju i poslove mjesnih zajednica: Kada ćete postaviti tablu Cerik u naseljenom mjestu Cerik? Kada građani Mjesne zajednice Cerik mogu očekivati realizaciju ovako velikog kapitalnog projekta?

Drugo vijećničko pitanje Službi za prostorno uređenje, zaštitu okoline, Službi za ekonomski razvoj, poduzetništvo i poljoprivredu: Da li objekti brze prehrane sa prostorom od 10 m2 mogu dobiti dozvolu za rad i pod kojim uslovima, te da li objekti sa privremenim dozvolama za korištenje gradskog zemljišta mogu otvoriti objekat brze prehrane i pod kojim uslovima? To je to.

NATAŠA PERIĆ

U redu. Hvala. Sljedeće vijećničko pitanje, vijećnik Hasib Hirkić. Izvolite.

HASIB HIRKIĆ – samostalni vijećnik

Prilažem.

NATAŠA PERIĆ

Prilažete. Vijećnici Ana Pajić i Anel Ibeljić? Nema nikog. Predlažem da...Pretpostavljam da prilažu. Vijećnica Sabiha Mujkanović Mujačić. Izvolite.

SABIHA MUJKANOVIĆ MUJAČIĆ – samostalni vijećnik

Zahvaljujem predsjedavajuća. Pozdravljam sve prisutne. Imam dva vijećnička pitanja. Oba su vezana za Mandiće.

Prvo vijećničko pitanje: Da li je izvršena blokada parcele u Mandićima, Mjesna zajednica Tušanj, bez valjano pravnog osnova? Dakle, obraćam se sa pitanjem za dostavu informacije u vezi sa izgradnjom puta za naselje Mandići, a posebno u dijelu postupanja inspektora Službe za inspeksijske poslove Grada Tuzla. Naime, urbanističko-građevinski inspektor je zatvorio dio gradilišta prema mojim saznanjima neosnovano, na osnovu lažnih isprava, odnosno tvrdnje da je podnesena tužba protiv Rudnika soli Tuzla, za utvrđivanje prava vlasništva pred Općinskim sudom u Tuzli, broj 32 0 P 427576 22 P od 04.07. 2022. godine. Dodatnom provjerom s Rudnikom soli, koji tvrdi da nikad nije zaprimio navedenu tužbu i dodatnom provjerom u CMS sistemu nije evidentirana navedena tužba. S toga postavljam pitanje nadležnoj službi kako je moguće da se izvrši blokada parcele broj 802/14 bez valjano pravnog osnova? Zašto je blokirano od inspektora ako nema osnove i ima li tu odgovornosti? Molim da se što prije provjeri predmet koji sam navela i da mi se odgovori na pitanje.

Drugo pitanje. Da li je Grad Tuzla morao plaćati kamate zbog neutrošenih sredstava za izgradnju puta u Mandićima i koliki je iznos u pitanju? Da se ne ponavljamo, svi smo upoznati sa problematikom puta u rješavanju imovinsko pravnih odnosa nastao je dugogodišnji problem s kojim smo upoznati svi. Dakle, pitanje koje mene zanima odnosi se na plaćanje kamata zbog neutrošenih sredstava, da li je Grad morao plaćati iste? Kolike je iznose kamata koje je Grad morao izmiriti na ime neutrošenih sredstava? Ukoliko jeste, da li će Grad nakon završenih sudskih sporova koji se očekuju u narednom periodu, ta sredstva potraživati od ljudi koji godinama svjesno i namjerno blokiraju izgradnju predmetne dionice? Da li će i ko će namiriti štetu koja je nastala u Budžetu Grada Tuzla?

NATAŠA PERIĆ

U redu. Hvala. Sljedeće vijećničko pitanje, vijećnik Zoran Jovanović. Izvolite.

ZORAN JOVANOVIĆ – samostalni vijećnik

Hvala predsjedavajuća. Pozdravljam kolegice i kolege, ostale prisutne.

Vijećničko pitanje Javnom komunalnom preduzeću Komunalac i Nadzornom odboru Javnog komunalnog preduzeća Komunalac Tuzla: Po kom osnovu je izrečena disciplinska mjera predsjedniku Sindikalne organizacije Javnog komunalnog preduzeća Komunalac Tuzla i na osnovu kojeg propisa?

E ovo je posljedica onog što guramo loše stvari pod tepih i onda će nam se to polako vjerovatno odbit od glavu. Ne bih želio da budem učesnik u ovom svemu. Poslije svih onih dešavanja na prošlom vijeću, proizvod tih dešavanja i guranja pod tepih, pismeno upozorenje predsjedniku Sindikalne organizacije Javnog komunalnog preduzeća Komunalac. Pismeno upozorenje pred otkaz ugovora o radu. Ovo je treniranje mišića gospodo. Nezakonit akt. Da bi se proveo disciplinski postupak protiv predsjednika Sindikalne organizacije mora se traži saglasnost Federalnog ministra za rad i socijalnu politiku. Ovdje je sve urađeno na prečac i pokušaj zastrašivanja sindikata i sindikalnih vođa. A osim ovoga, čak mu je promijenjeno radno mjesto. A tamo kaže, šest mjeseci nakon i za vrijeme obavljanja funkcije, ne može ga degradirati i promijenit radno mjesto. Zato tražim odgovor.

Drugo pitanje je isto Nadzornom odboru Javnog komunalnog preduzeća Komunalac Tuzla: U dva navrata sam tražio podatke kome i u kolikom iznosu isplaćeno na ime teške bolesti u Javnom komunalnom preduzeću Komunalac, ako se sjećate finansijskog izvještaja za 23-u godinu, 420.000 odvojeno po dva osnova za isplatu naknade za slučaj teške bolesti?

I dobijam prvi odgovor da mi nisu u mogućnosti odgovorit u skladu sa Zakonom o zaštiti ličnih podataka, što nema veze. Drugi puta tražim od Službe za komunalne poslove. Odgovor je da oni nisu nadležni. I evo sad šaljem Nadzornom odboru koji je nadležan za

zakonitost rada Javnog komunalnog preduzeća Komunalac Tuzla. Nadam se da će mi oni ovo dostaviti. A ukoliko ne dostave, onda imaju i druge institucije koje će ovo odraditi i tražiti.

I treće vijećničko pitanje je: Po kom osnovu se vrši obračun zastezanih kamata po ispostavljenim računima za utrošenu električnu energiju, navodno po zakašnjelim uplatama, iako građani računa dobijaju na kućnu adresu sa zakašnjenjem ili nikako, te moraju lično ići po njih u poslovnicu Elektrodistribucije?

Jedna pojava velika, ne znam da li ste pratili one cifre na računu. Kaže, kamata na zakašnjelu uplatu. Dva feninga, tri. Nije to neki iznos. I vjerovatno Elektrodistribucija računa s ovim ovakvim razmišljanjem ko što i ja razmišljam nikom nije puno, al na 500.000 pretplatnika uberu se nezakonito sredstvo. Ovo je nezakonit vid bogaćenja. Tražim da se ovo vijećničko pitanje uputi Elektrodistribuciji. Kamatu može obračunavati samo banka po zakonu i sud putem sudskog vještaka. Ne može onaj ko vam ispostavlja račun obračunati vam kamatu.

I imam jednu inicijativu. (NATAŠA PERIĆ – A to kad dođemo do inicijative). Dobro. Hvala.

NATAŠA PERIĆ

Vijećnica Selma Ćatibušić. Neka se pripremi vijećnik Berbić. Izvolite.

SELMA ĆATIBUŠIĆ – vijećnik Platforme za progres

Dobar dan svima. Na osnovu člana 91. Poslovnika o radu Gradskog vijeća Grada Tuzle upućujem sljedeće vijećničko pitanje Ministarstvu unutrašnjih poslova Tuzlanskog kantona: Koja je procedura postupanja u slučajevima vršnjačkog nasilja u školama? Koje je zvaničan broj slučajeva vršnjačkog nasilja koji su prijavljeni policiji od početka 2023. godine, pa sve do danas, te koliko često policija u svom opisu poslova ima zadatak da obilazi škole? Da li uopšte posjeduje kapacitete za to? Da li se to vrši u civilu ili u uniformi i koji su sve prijedlozi samog Ministarstva unutrašnjih poslova za suzbijanje vršnjačkog nasilja u školama među djecom?

Ministarstvo obrazovanja, nauke i kulture, pardon Ministarstvo obrazovanje i nauke Tuzlanskog kantona: Koje sve odluke i smjernice su donesene u pravcu borbe protiv vršnjačkog nasilja, obzirom da se u medijima pojavila informacija da su u mjesecu martu kreće kampanja borbe protiv vršnjačkog nasilja. Obrazloženje je u samom vijećničkom pitanju.

Dalje. Postavljam vijećničko pitanje resornom ministarstvu, odnosno Ministarstvu obrazovanja i Vladi Tuzlanskog kantona: Koje škole na području Tuzlanskog kantona sprovode program obaveznog obrazovanja odraslih, koja nisu iz određenih razloga na vrijeme mogla završiti osnovnu školu i na koji način to funkcioniše? Da ne bi čitala cijelo obrazloženje, ono što je situacija na terenu jeste da je to dosta neujednačen proces. Procedura nije definisana. Postoji nekoliko škola koje su navedene na stranici Ministarstva da sprovode program obaveznog osnovnog obrazovanja. Međutim, taj program apsolutno nije ujednačen. Ne znam kako se očekuje da osobe koje nisu završile iz raznoraznih razloga osnovnu školu, mogu da se i na pravi način informišu i da imaju znanja oko toga kako upisati ovu školu kad mi koji smo eto u svemu tome, ne možemo doći do pravih informacija. Kada pozovete ministarstvo, ni oni ne znaju koje su to procedure, koje su to škole, kada su upisi? Jedna škola kaže biće konkurs ukoliko bude zainteresiranih učenika. Kako ćete znati da li imate zainteresirane učenike ako niste ni objavili konkurs? Druga škola kaže biće upis u martu. Treća kaže pa biće u junu. Pa vidjećemo i slično.

Smatram da je neophodno da se jasno definiše postupak procedura. Ne samo djece, koja su svakako je li u obavezi da pohađaju i završe osnovnu školu, nego i odrasli, koji su, je li, navršili 18 godina, a nisu iz kojekakvih, ovaj, razloga mogli da završe osnovno obrazovanje. I eto sad žele to. Mi nismo ni svjesni koliko stanovnika našeg kantona nažalost još uvijek nema

osnovnu školu. To su definitivno najčešće osobe iz marginiliziranih sredina i lokacija, ali smatram da je neophodno ujednačiti ovaj program, olakšati ga maksimalno i ne dozvoljavati da samo se privatna praksa bavi ovima, nego smatram da mi imamo dovoljno resursa da obezbijedimo da svaki stanovnik našeg kantona makar ima osnovnu školu za početak, a da ne govorim o srednjoj i fakultetu. Hvala.

NATAŠA PERIĆ

Hvala Selma. Vijećnik Berbić. Izvolite.

OMER BERBIĆ – vijećnik Naše stranke

I ja ću priložiti tri, pa ću donijeti kasnije.

NATAŠA PERIĆ

Dobro. Sad prelazimo na

VIJEĆNIČKE INICIJATIVE

Vijećnik Hasib Hirkić. (HASIB HIRKIĆ – Prilažem). Prilažete. Dobro. Vijećnik Senad Mehmedinović. Izvolite.

SENAD MEHMEDINOVIĆ

Prva inicijativa. Inicijativa za izgradnju pješačke staze na pravcu od Obdaništa „Pčelica“ do Ekonomskog fakulteta duž Jale. Neću čitati obrazloženje.

Druga inicijativa za postavljanje kamere za praćenje brzine u ulici Prve tuzlanske brigade (Brčanska Malta) ispred Super bloka.

Imam treću. Tu je kod vas predsjedavajuća.

NATAŠA PERIĆ

Dobro. Hvala. Vijećnik Elvir Bijedić.

ELVIR BIJEDIĆ - vijećnik Socijaldemokratske partije

Zahvaljujem predsjedavajuća. Želim vas sve pozdraviti i reći da prilažem svoju vijećničku inicijativu. Hvala.

NATAŠA PERIĆ

Dobro. Anel i Ana. (ANA PEJIĆ – Prilažemo). Prilažete. Dobro. Sabiha. Izvoli.

SABIHA MUJKANović MUJAČIĆ

Zahvaljujem. Imam tri vijećničke inicijative danas.

Prva inicijativa je inicijativa da se neperspektivna vojna imovina na Kozlovcu da na korištenje i upravljanje lokalnoj zajednici, kako bi se iskoristila za razvoj privrednog/turističkog potencijala grada Tuzla.

Dakle, prije svega želim da naglasim da je ovo prijedlog gospodina Omera Isovića, uz čiju saglasnost podnosim ovu inicijativu Gradskom vijeću Grada Tuzla i nadam se da će svi drugi uvidjeti važnost, korist i obimnost iste i da ćemo zajedno raditi na njenoj realizaciji. Dakle, prije rata na Kozlovcu se nalazio jedan od najvećih voćnjaka u BiH, znaju to svi oni koji su rođeni i živjeli ovdje i tokom ratnog razdoblja posječene su gotovo sve voćke. Ova zemlja je proglašena za neperspektivnu vojnu imovinu, a Ministarstvo odbrane Bosne i Hercegovine je zadržalo samo magacine. Prema nekim informacijama u pitanju je 100 dunuma zemlje. Mogućnosti su brojne. Ja ću navest neke. Resorno ministarstvo bi moglo financirati rekultivaciju zemljišta i sadnju više od 7000 voćki, može predstavljati i osnovu za neku fabriku za preradu voća i povrća, kao i stakleničku i plastičnu proizvodnju. Sam položaj kompleksa Kozlovac omogućava izgradnju ugostiteljskog kompleksa sa bazenima, staza za rekreativni biciklizam, zip line, amaterske sportove, kao i za rekreativno skijalište i sankalište, što Tuzli svakako nedostaje. Potpuna priroda omogućava otvaranje škole jahanja, te niz drugih sadržaja za djecu u prirodi ili neki tematski dječiji park.

Druga inicijativa je inicijativa za obnovu izvorišta vode na području grada Tuzla.

U našem gradu postoje brojni izvori prirodnog bogatstva koje, nažalost, ne iskorištavamo i ne promoviramo kako treba. Termalni izvor u Slavinovićima, izvorište pitke sumporne vode u Miladijama, izvorište na Kiseljaku, samo su neki od njih. Termalni izvor koji se nalazi u Mjesnoj zajednici Slavinovići, koji je potpuno zapušten, trebalo bi bolje iskoristiti, napraviti turističku atrakciju od toga. Mogućnosti su brojne, od termalnih banja do termalnih otvorenih i zatvorenih bazena, kako bi se ljekovitost ove vode iskoristila za poboljšanje zdravlja naših građana. Izvorište pitke sumporne vode nalazi se u Miladijama, takođe je zapušteno. Velika finansijska sredstva za uređenje istog nisu potrebna. Neophodno je isti urediti zajedno sa česmama, na adekvatan način uvesti rasvjetu i postaviti tablu sa osnovnim informacijama o istim. Taj izvor svakodnevno posjećuju naši sugrađani iz različitih mjesnih zajednica. Izvorište na Kiseljaku, govorimo dakle o dva izvorišta koja su jedno do drugoga. U proteklom periodu su renovirani, zadnji put 2016. godine, u saradnji sa Fondacijom Tuzlanske zajednice (NATAŠA PERIĆ – Molim malo tišine, molim vas) i Grada Tuzle, kada je obnovljena natkrivena asvalitrana okolina, postavljena dječija igraona i sprave za mlade. Jedno od izvorišta je gradsko vlasništvo 1200 m², dok se drugo nalazi po papirima u privatnom posjedu, što bi trebalo prevesti na Grad, jer to nije učinjeno u bivšoj državi. Dakle, trebalo bi dio od nekih 30 m² prevesti na Grad, ograditi posjed nekim zelenilom i još nekim detaljima kako bi izvorište bilo zaštićeno. Ukoliko imovinsko pravni odnosi na ovim lokacijama nisu riješeni, predlažem da se odmah pokrene postupak za rješavanje istih, jer bi i sam Grad kao i naši sugrađani imali velike koristi od toga.

Treća inicijativa je inicijativa za izgradnju kolektora komunalnih otpadnih voda sa postrojenjem za prečišćavanje.

Dakle, prije 15 godina tadašnja Općina Tuzla pokrenula je niz aktivnosti kako bi se riješio problem Jale kao kolektora otpadnih voda i započelo se sa izradom „Studijom odvodnje i tretmana otpadnih voda za područje općine Tuzla“, ali pomaka nema do današnjeg dana, iako je zakonski regulisano, te bi po tome trebalo biti i kažnjivo, u Jalu se bez ikakvog pročišćavanja izljevaju industrijske otpadne i fekalne vode. Sa druge strane, razvoj kanalizacione mreže nije pratio porast stanovništva. Ovdje neću dalje čitati, pošto je dugo obrazloženje. Ima navedeno šta je tada studijom planirano, pa evo podnosim ponovo tu inicijativu.

NATAŠA PERIĆ

U redu. Hvala. Vijećnik Omer Delalić. Izvolite.

OMER DELALIĆ – samostalni vijećnik

Hvala predsjedavajuća. Obratili su mi se roditelji djece iz Slavinovića i podnosim inicijativu da se asfaltira pješačka staza do Richmond Park škole.

Podnosim inicijativu da se u narednom periodu asfaltira pješačka staza do Richmond Park škole, do mosta u Slavinovićima kako djeca, za vrijeme kišnih perioda ne bi išla do škole kroz blato.

Druga inicijativa da se napravi šetalište od Slavinovića prema Simin Hanu.

Podnosim inicijativu da se napravi šetalište od bivše Policijske stanice u Slavinovićima prema Simin Hanu uz Jalu, čime bi se produžilo šetalište od Sjenjaka do Slavinovića, koje je uvijek puno šetača. Isto je potrebno asfaltirati, posaditi drveće i razvesti rasvjetu, čime bi se stvorili uslovi da se može prošetati jedna zaista solidna dionica. O zdravstvenim benefitima nema ni potrebe da govorimo.

I treća inicijativa da se napravi multifunkcionalna sportska dvorana na području Mjesne zajednice Slavinovići.

Podnosim inicijativu da se napravi multifunkcionalna sportska dvorana u gornjem dijelu grada, s obzirom da nema niti jedan prostor na tom području koji bi mogao da bude namijenjen sportskim događajima. S obzirom da u gornjem dijelu grada ima veliki broj stanovnika i najveće mjesne zajednice (Ši Selo, Stupine, Sjenjak, Brčanska Malta, Grabovica, Slavinovići, Simin Han) zaista je poželjno da u tom dijelu grada imamo jednu takvu dvoranu.

Kako smo svjedoci da u gradu svake godine se stvaraju novi sportski klubovi i da sve više djece se bavi sportom, tako se sve više osjeti potreba za izgradnjom jednog takvog objekta. Posebno je evidentan deficit prostora, ne samo za košarku ili rukomet, nego i za borilačke sportove ili razvitak streljaštva. Hvala.

NATAŠA PERIĆ

Hvala Omere. Sljedeća za riječ se javila vijećnica Lejla Osmančević. Izvolite.

LEJLA OSMANČEVIĆ – samostalni vijećnik

Zahvaljujem. Pozdravljam sve prisutne. Ja imam dvije vijećničke inicijative. Obje su upućene Službi za komunanlne poslove, izgradnju i poslove mjesnih zajednica i vezane su za naselje Solina.

Prva inicijativa je za rješavanje pješačkog dijela staze i trotoara u ulici Armije Republike BiH od druge kapije Kasarne Husein-kapetan Gradašćević do preduzeća Volan u naselju Solina.

Kratko. Na putu ulice Armije Republike BiH od druge kapije Kasarne do preduzeća Volan postoji usko grlo suženja puta kojim se kreću pješaci i koje svojom ahitektonskom strukturom ugrožava sigurnost pješaka naročito djece školske dobi na putu do škole. Prema stručnoj analizi ovo nije trotoar i ima funkciju ostrva za uličnu rasvjetu. Na pomenutom dijelu trotoara pješaci su prinuđeni da silaze na ulicu bilo da se kreću kao pojedinci ili mimoilaze sa pješacima iz kontra strane, ili se moraju provlačiti između stuba ulične rasvjete. S obzirom na sve navedeno, može se ugroziti sigurnost pješaka, ali i vozača u saobraćaju, te molim da skorije rješavanje ovog problema.

I drugo je inicijativa za reknstrukciju ili ponovnu izgradnju terena za mali fudbal u Novom Naselju Solina.

Navedeni teren je nekad bio namijenjen za sport naročito mali fudbal, kao i ostale aktivnosti stanovnika ovog naselja. Ovaj teren je smješten između zgrada u lijepom prirodnom i sigurnom okruženju, što daje mogućnost uključivanja djece u sportske aktivnosti i takmičenja.

Opravdanje za ovako loše stanje na ovom sportskom terenu, ne mogu biti neodgovorni pojedinci. Zahvaljujem.

NATAŠA PERIĆ

Hvala. Sljedeći vijećnik Ćerim Rastoder. Izvolite.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Zahvaljujem predsjedavajuća. Ja imam jednu inicijativu, al je neću čitati, s obzirom da je kolega Omer Delalić otprilike podnio sličnu inicijativu vezano za izgradnju pješačke, odnosno biciklističke staze od Slavinovića do Simin Hana. Ja sam to samo formulisao od Simin Hana prema Slavinovićima. Pa eto.

NATAŠA PERIĆ

Dobro. U redu. Hvala. Molim vas malo tišine. Sljedeća vijećnička inicijativa Zoran Jovanović. Neka se pripremi vijećnica Esana Kavazbašić.

ZORAN JOVANOVIĆ

Hvala predsjedavajuća. Iskoristiću jednu minutu vremena da se zahvalim Službi za komunalne poslove i njihovom šefu. Na prošlom Vijeću sam postavio pitanje za onu jednu sijalicu ulične rasvjete u Mramoru. Dok smo mi bili ovdje, ekipa je otišla dole, provjerila i evo radi se neka tehnička dokumentacija. Nadam se da će doć ta jedna sijalica ubrzo, radi naših građana koji žive u mraku, bez obzira na svjetlo.

Inicijativa prema Javnom komunalnom preduzeću Komunalac Tuzla. Ja napo na Komunalac, a nemam ništa lično protiv njih stvarno.

Do uvođenja nove cijene odvoza smeća u naselju Solina i Gornja Tuzla, smećara je, onaj, kamion, smećara je kupila smeće dva puta sedmično. Poslije povećanja naknade za odvoz smeća u ovim naseljima pošto se susrećem, gore imam i rodbinu i građane, odvoz smeća se vrši jednom dnevno, jednom sedmično, umjesto dva puta da se zadrži. Predlažem da se vrati na staro stanje, da se smeće u ova dva naselja vozi dva puta sedmično kao i do sada. Hvala.

NATAŠA PERIĆ

U redu. Hvala. Vijećnica Esana Kavazbašić. Neka se pripremi vijećnik Kapidžić.

ESANA KAVAZBAŠIĆ HUSKANović

Ja danas imam...Hvala predsjedavajuća. Ja danas imam dvije inicijative.

Znači, prva inicijativa je da se izgradi spomen ploča na mjestu ubistva Amre Kahrimanović.

A druga inicijativa, naravno, uz konsatacije sa porodicom. A druga inicijativa je da nazovemo jednu ulicu u gradu il trg po njenom imenu. Hvala.

NATAŠA PERIĆ

U redu. Hvala. Sljedeća vijećnička inicijativa vijećnik Alen Kapidžić. Neka se pripremi vijećnica Čatibušić.

ALEN KAPIDŽIĆ – vijećnik Socijaldemokratske partije

Hvala predsjedavajuća. Ja imam takođe dvije inicijative.

Prva je upućena Službi za komunalne poslove, izgradnju i poslove mjesnih zajednica.

Obzirom na veliki broj žalbi građana na postojanje adekvatnih saobraćajnih znakova usljed čega je ugrožena bezbjednost učesnika u saobraćaju, molim vas da hitno krenete u realizaciju postavljanja saobraćajnih znakova na mjestima gdje oni nedostaju. Takođe moram napomenuti da imamo valiki broj primjera da na pojedinim mjestima su bili postavljeni saobraćajni znakovi, al trenutno iz nekih razloga nisu na mjestima na kojima su bili.

Druga inicijativa. Pardon. Upućena Službi za prostorno uređenje i zaštitu okoline i Zavodu za urbanizam.

Obratili su nam se građani ulice Đure Đaković, naselje Zlokovac, sa zahtjevom za rješavanje parking prostora građana ove ulice. Kod naših sugrađana je prisutno veliko nezadovoljstvo i ogorčenje nastalo zbog nedostatka parking prostora, a koje je uzrokovano izgradnjom zgrade, za koju evidentno nije obezbijeđen dovoljan broj parking mjesta. Obzirom da naši sugrađani trenutno parkiraju svoja vozila na mjesta koja nisu predviđena za parking, suočeni su sa plaćanjem brojnih kazni, a naravno iz razloga zato što nemaju gdje da parkiraju, a kako su naveli građani ove ulice i sa brojnim uklanjanjem njihovih vozila od strane vozila Pauk. Obzirom da sam istu inicijativu uputio Službi za komunalne poslove 31. januara 2024. godine, Služba je konsatovala u odgovoru i ovom prilikom se zahvaljujem na brzom odgovoru. Konstatovala da prema njihovim procjenama nedostaje oko sto parking mjesta samo za navedeni objekat. I prijedlog. Ja mogu dati odgovor u prilogu jel. I prijedlog je da se obratimo ovim Službi za prostorno uređenje i Zavodu za urbanizam, a haj da kažemo da inicijativom da se hitno krene u rješavanje ovog problema na način da se kroz izradu Regulacionog plana ili drugog dokumenta pokuša osigurati adekvatno parkiranje vozila za stanare ove ulice. Hvala.

NATAŠA PERIĆ

U redu. Hvala Vijećnica Selma Čatibušić. Neka se pripremi vijećnik Berbić.

SELMA ČATIBUŠIĆ

Prvu vijećničku inicijativu prilažem Javnom komunalnom preduzeću Saobraćaj i komunikacije Grada Tuzle, kao i Gradskom vijeću Grada Tuzle, odnosno prilažem urgenciju na inicijativu za davanje besplatnog parkinga za osobe koje su darovale krv više od deset puta. Pardon, dvadeset puta. Izvinjavam se. Obzirom da je to moja inicijativa od prije evo skoro dvije godine, godinu i po otprilike, pa sam dobijala nekakve različite odgovore.

Obrazloženje će biti da dobrovoljni davaoci krvi koji su darovali krv više od dvadeset puta imaju već određene povlastice, npr. besplatna markica ili slično. Međutim, značaj njihove aktivnosti i njihovog dobrotvornog rada je zaista velik.

Predlažem da Grad Tuzla snosi troškove u vidu snošenja troškova za PDV za izradu tih kartica, a da Javno komunalno preduzeće preuzme na sebe, da napravi zapravo te kartice, obezbijedi besplatan parking za osobe koje su više od dvadeset puta darovale krv.

To je urgencija na inicijativu i zaista se nadam da će ovaj put biti usvojena.

Druga vijećnička inicijativa odnosi se na formiranje Vijeća za prevenciju maloljetničke delikvencije na nivou grada Tuzle, a nju prilažem prvenstveno Kolegiju Gradskog vijeća Grada Tuzle, kao i Gradskom vijeću Grada Tuzle.

Obrazloženje: Obzirom da smo u prethodnom periodu formirali i zdravstveni savjet, mišljenja sam da jedan ovakav savjet sastavljen od najstručnijih također je potreban našem gradu. Uloga i zadaci vijeća za prevenciju maloljetničke delikvencije bili bi razvijanje preventivnih programa u lokalnoj zajednici u cilju prepoznavanja i ranointerventnog djelovanja sprečavanja poremećaja u ponašanju kod djece i mladih.

Dalje. Uvezivanje institucija radi ojačanog pružanja usluga u oblasti socijalne i dječije zaštite. Sprečavanje i ublažavanje socijalnopedagoških problema djece i mladih, djelovanje u smjeru poticaja pozitivnih promjena u ponašanju i uvjetima u kojima odrastaju i razvijaju se. Donošenje akcionog plana prevencije vršnjačkog nasilja i maloljetničke delikvencije na području grada Tuzle. Ovim će se stvoriti uslovi za primjenu svih vaspitnih preporuka, kao i alternativnih mjera u reagovanju na maloljetničku delikvenciju kako bi se maloljetnik prvi puta koji čini određeno djelo lakšeg intenziteta izbjeglo njegovo etiketiranje izricanjem krivičnih sankcija kojima je cilj represija. Kreirat će se preventivni program maloljetničkog prestupništva i prepoznavanja djece u riziku u osnovnim školama i srednjim školama na teritoriji grada Tuzle. Omogućiti kvalitetniju multidisciplinarnu i multisektorsku saradnju, osnaživanje subjekata provedbe mjera koje vijeće za prevenciju maloljetničke delikvencije predlaže. Bila bi: maloljetnička delikvencija i problemi u funkcionisanju porodice, tj. problemi u porodici kao indikatori poremećaja u ponašanju kod djece, upozorenje roditeljima na propuste u odgoju same djece. Osnaživanje institucija nedostajućim stručnim kadrom za rad na prevenciji poremećaja u ponašanju i maloljetničke delikvencije. Dostignutu razinu partnerskog umrežavanja i koordinacije unapređivati na svakodnevnoj razini kroz ulogu i funkcionisanje samog vijeća za prevenciju maloljetničke delikvencije. Inicijative, uključivanje u projekte i konstruktivni prijedlozi savjeta mladih koji se bave, je li, savjeta mladih ili udruženjima koji se bave pitanjima mladih i djece, interesnih grupa, stručnjaka i samih građana, podloga su u radu ovog vijeća koji bi mogao imati potencijal za bržu uspostavu kontakata mjerodavnih i zainteresiranih da se što brže i što hitnije sprovede ovakva jedna ideja.

To je naravno još šire objašnjeno u samom obrazloženju inicijative, a treću vijećničku inicijativu, odnosno opet urgenciju na vijećničku inicijativu koja je bila kako sam dobila odgovor od strane nadležne Službe i Službe za urbanizam faktički usvojena, odnosno, imala je podršku od strane nadležnih službi, tj. da Grad Tuzla će u predstojećem periodu, a nadam se do kraja ove godine napraviti jedan spomenik sjećanja žrtvama femicida.

Molim nadležne službe kada dobiju moju inicijativu, bar kad sam ja u pitanju, da ne budu neke floskule tipa „Vaša inicijativa je super“. „Razmislit ćemo o tome“. „Al de vi vidite sa porodicama, sa udruženjima“. „Kako oni razmišljaju?“ Svi zajedno moramo ići u tom smjeru. Niko ne može preuzeti cijeli posao, nit je to na kraju krajeva samo moje da se ja time bavim, nego upravo službe koje su na kraju krajeva za to i plaćene. Zajedno sa podnosiocima inicijative.

Tako da predlažem urgenciju na ovu inicijativu i predlažem formiranje već u kratkoj budućnosti prvenstveno sastanak sa porodicama žrtava, sa udruženjima koji se bave pitanju žena ili zaštite žena, odnosno uopšteno nasilja kako u porodici, tako i svih oblika nasilja i da Grad Tuzla eto, možemo reći makar prednjači u kreiranju takvog jednog spomenika sjećanja koji će ujedno biti i opomena da Grad Tuzla neće ostati nijem na ovakva dešavanja.

Kalesija kao manja lokalna zajednica ima spomenik sjećanja na žrtve koje su našalost preminule od karcinoma. Obično se radi o mladim osobama. Na takav način da su makar napravili park koji redovno održavaju u vidu postavljanja i sađenja različitih ruža i njihova imena i slično, a mislim da Grad Tuzla također može napraviti iskorak i kada je ovaj problem,

je li, u pitanju i pokazati da ne samo da se solidariše, ne samo da će raditi na prevenciji, nego definitivno i kažnjavanju ovakvih, a najmanje u ruku mogu reći jako tragičnih situacija. Hvala.

NATAŠA PERIĆ

Hvala Selma. Vijećnik Berbić. Izvolite.

OMER BERBIĆ

Ja ću priložiti tri inicijative, pa ću donijet.

NATAŠA PERIĆ

Dobro. Hvala.

Prelazimo na drugu tačku dnevnog reda:

**OSUDA MONSTRUOZNOG UBISTVA AMRE KAHRIMANOVIĆ, UZ
PREPORUKU VLADI I SKUPŠTINI TUZLANSKOG KANTONA I DRUGIM
NADLEŽNIM ORGANIMA ZA SANKCIONISANJE ODGOVORNIH I
PODUZIMANJE HITNIH PREVENTIVNIH MJERA ZA KADROVSKO I
TEHNIČKO JAČANJE MUP-A TUZLANSKOG KANTONA, S CILJEM ZAŠTITE
GRAĐANA**

Predlagач: Esana Kavazbašić Huskanović, ispred Kluba vijećnika Platforme za progres
Materijal su razmatrali: klubovi vijećnika.

Vijećnice Kavazbašić trenutno nema ovdje u sali.

Pa nema veze...Otvaram raspravu...

Da li ima potrebe da se pročitaju izvještaji komisija?

Otvaram raspravu klubova vijećnika.

Vijećnica Selma Čatibušić ispred Kluba Platforme za progres. Izvolite.

SELMA ČATIBUŠIĆ

Evo ovako. Prvo ću se referisat na postavljeno pitanje moje Ministarstvu unutrašnjih poslova na koje sam dobila odgovor u septembru 2023. godine, a postavila sam ga nekad tamo ne znam, možda u avgustu prethodne godine ili u julu mjesecu. Bilo je vezano konkretno za nasilje u porodici, broj slučajeva i sigurnosne situacije kada je u pitanju nasilje u porodici. Dobila sam odgovor da u periodu 2022-2023. godine, službenici policije, odnosno Policijske uprave Tuzla zaprimili su 120 prijava nasilja u porodici, po kojima su poduzete, a za neke od prijave se i dalje poduzimaju sve potrebne mjere i radnje u skladu sa Zakonom o zaštiti od nasilja u porodici Federacije Bosne i Hercegovine, kao i Zakon o krivičnom postupku Federacije Bosne i Hercegovine. Od navedenog ukupnog broja, evidentirane su 74 prijave nasilja u porodici u kojima su žrtve žene. Znači, od 120, 74 su žrtve žene. 8 prijave nasilja u porodici u kojima su žrtve muškarci od strane žena. 32 prijave nasilja u porodici u kojima su žrtve maloljetna lica od strane odraslih osoba. 5 prijave nasilja u porodici u kojima su žrtve odrasle osobe od strane maloljetnih lica i 1 prijava nasilja u porodici u kojima je žrtva malodobno dijete od strane drugog malodobnog lica.

Službenici policije po svakoj prijavi nasilja u porodici postupao je u skladu sa Zakonom o zaštiti od nasilja u porodici u Federaciji Bosne i Hercegovine, kako navode, gdje po zaprimanju prijave i potvrđivanju navoda prijave obavještavaju dežurnog tužioca Kantonalnog tužilaštva Tuzlanskog kantona, te poduzimaju sve potrebne mjere i radnje po uputama tužilaštva, a u skladu sa Zakonom o krivičnom postupku Federaciji Bosne i Hercegovine.

Također, u skladu sa Zakonom o zaštiti od nasilja u porodici u cijju zaštite žrtve, službenici policije su obavezni da nakon što istu saslušaju i utvrde da postoje osnovi sumnje koje ukazuje na nasilje u porodici, istu informišu o mogućnostima zbrinjavanja u nadležnu sigurnu kuću, a ukoliko je žrtva malodobno lice, odmah moraju upoznati nadležni organ starateljstva koji će dalje preduzeti određene mjere u cilju zaštite malodobne žrtve.

Dalje. U cilju zaštite žrtve je prema članu 17. i 18. Zakona o zaštiti od nasilja u porodici Federacije Bosne i Hercegovine, podniet će se zahtjev Zakona o zaštiti od nasilja u porodici u Federaciji Bosne i Hercegovine, koji zahtjev službenici policije, službenik policije donosi se rješenje kojim određuju zaštitnu mjeru ili odbija prijedlog za izricanje zaštitne mjere, pripremanje, planiranje i provedba zaštitnih mjera iz nadležnosti policijske stanice na čijem području se nalazi žrtva, gdje ima prebivalište ili boravište.

Policijska uprava grada Tuzle na gore navedenom periodu, 2022 – 2023. godine, nije imala evidentiranih prijava nasilja u porodici gdje je došlo do upotrebe vatrenog oružja. To je odgovor koji sam ja dobila, znači, 14.09.2023. godine. Ja znam, evo konkretno samo jedan slučaj gdje je došlo do upotrebe vatrenog oružja i gdje se radilo o nasilju u porodici.

Znači, ja sam se o ovom slučaju referisala samo za nasilje u porodici, konkretno za ovo moje vijećničko pitanje, jer se uopšteno bavim je li evo tokom cijelog svog mandata i nekako u svojoj privatnoj praksi suzbijanju kako vršnjačkog tako i svih nekako oblika nasilja, nažalost svjedoci smo da nasilje nije apsolutno porodična stvar. Da je ona jednostavno sada uzela maha i da žene u ovom gradu, prvenstveno žene, ne kažem da to nisu i muškarci ili jesu i muškarci, prvenstveno malodobna djeca, odnosno djeca i žene su u ovom gradu nedovoljno sigurni u najmanju ruku.

U skladu s tim, tražim odgovore od Grada Tuzle, šta je sve Grad Tuzla uradio i šta će uraditi u cilju suzbijanja nasilja nad ženama? Eto, al nek bude naravno u cilju suzbijanja nasilja uopšteno nad osobama?

Da, imali smo neke inicijative koje se tiču sigurnih kuća, koje se tiču dodjeljivanja, odnosno prednosti prilikom dodjeljivanja stanova u vlasništvu Grada Tuzle, gdje bi se žrtva sakrila od nasilnika da se ne vraća u kuću u kojoj on se nalazi i slično. Bilo je neke inicijative koje se tiču simobličnog je li sjećanja na žrtve koje su nažalost svoj život izgubile na najbrutalniji način. Ali smatram da Tuzla kao lokalna zajednica koja prednjači u Tuzlanskom kantonu, odnosno koja je, je li, nosilac hajd da tako kažem, da ne budem pogrešno shvaćena nosilac samog Tuzlanskog kantona, odnosno centar Tuzlanskog kantona, mora definitivno da pokaže veći otpor, veće zalaganje i veću borbu protiv svih oblika nasilja.

Stoga tražim, odnosno predlažem zaključak da će, da ću od Grada Tuzle, Grad Tuzla u skladu sa svim svojim kapacitetima, tačnije nadležnim službama, da će sve nadležne službe dostaviti informaciju šta one rade u cilju suzbijanja nasilja, kako nad ženama, naravno et nek tako i nad muškarcima.

Šta Grad Tuzla planira raditi u budućnosti u cilju suzbijanja ovakvih pojava? Da li će Grad Tuzla podržati inicijative koje se tiču kulture sjećanja na žrtve koje su na najbrutalniji ovakav način izgubile svoj život? I na koji način će Grad Tuzla uspostaviti bolju komunikaciju i natjerati Ministarstvo unutrašnjih poslova na jači rad, bolji rad i na to da će nam zajedno sa Vladom Tuzlanskog kantona, nadam se u budućnosti nekad omogućiti sigurniji prostor za život, kako za našu djecu, tako i za nas?

Tako da, onaj, to su neki moji zaključci.

Dalji zaključak koji predlažem tiče se na, također, moju prethodnu inicijativu, odnosno, urgenciju za inicijativu, ali eto nasloniću se na zaključak da će Grad Tuzla u budućnosti do kraja godine oformiti jedan park sjećanja ili spomenik sjećanja na žrtve femicida. Naravno, prvenstveno konsultovati se sa porodicama žrtava, kao i udruženjima koja se bave ovim pitanjima. Toliko za sada.

Još jednom. Samo ma...samo. Izvinjavam se. Želim zaista da izrazim još jednom duboko saučešće porodicama koje su nažalost izgubile na ovakav način svoje najmilije, kako porodice Amre Kahrimanović, tako i porodici Selme Baluković koja je nedavno također na najbrutalniji mogući način izgubila svoj život, ali i svim porodicama koje su nažalost zaista i moji prijatelji i koji su, ovaj, izgubili svoje najmilije u jednom trenutku, a apsolutno nisu na bilo koji način doprinijeli nažalost tome, nego su ostali, ostali oštećeni za cijeli život, bez da je sistem nešto ipak pokušao malo više uraditi. Hvala.

NATAŠA PERIĆ

Hvala vijećnici Čatibušić.

Da li se još neko javlja ispred klubova vijećnika?

Zatvaram raspravu klubova vijećnika.

Otvaram raspravu vijećnika. Vijećnik Hasib Hirkić. Neka se pripremi vijećnik Berbić.

HASIB HIRKIĆ

Zahvaljujem predsjedavajuća. S obzirom da je ozbiljna tačka u pitanju, pozdravljam sve prisutne i koristim ovu priliku u ime svih vijećnika i vijećnica da izrazim još jednom saučešće porodici i prijateljima.

Gradsko vijeće Tuzla osuđuje svaki vid nasilja, a pogotovo osuđujemo monstruozno ubojstvo naše sugrađanke. Ali moram da napomenem da je u avgustu ove godine, prošle godine, Gradsko vijeće raspravljalo o sigurnosno bezbjedonosnoj situaciji na području grada Tuzla, a i šire i donijelo je niz zaključaka, pa ovim putem pozivam nadležne da postupe po zaključcima koje je donijelo ovo Gradsko vijeće u avgustu 2023. godine.

Što se tiče nas kao vijećnika i vijećnica pružamo punu podršku, znači porodici, a ovom prilikom bi možda i poručio jednu poruku poslao premijeru našem, da je ovo slobodan grad, da ovo nije enklava i da ovdje ne treba nikakva ulaznica ili odobrenje da neko iz drugih gradova dođe i da podršku porodici ubijene. Ne bih volio da se mi kao građani grada Tuzle ili kantona koristimo kao statistika, kao što premijer u svojim izjavama i istupima to koristi. Nismo mi statistika da se poredimo sa Sarajevom ili nekim drugim gradovima, nego su plaćeni da rade svoj posao pošteno i odgovorno i izabrani su od ovih građana da prvenstveno štite živote i imovinu ovih građana. Eto toliko i hvala.

NATAŠA PERIĆ

U redu. Hvala kolega Hirkiću. Sljedeći za riječ se javio vijećnik Berbić. Neka se pripremi vijećnica Merima Softić Sprečić.

OMER BERBIĆ

Ja ću biti relativno kratak, jer o ovoj temi je puno toga rečeno. Prvensteno bi izrazio najdublje saučešće porodici, prijateljima, svima koji su poznavali Amru i sve ostale žene koje su žrtve porodičnog nasilja i ubistava.

Hoću da se zahvalim porodici prvenstveno Amre ovim putem na građanskoj hrabrosti što su povukli masu ljudi u vremenu kada je njima bilo najteže i što se bore da se nešto promijeni u ovom sistemu, koji je očigledno postao sam sebi svakav. Da ne bi sad ulazio u neke zaključke oko toga šta se može napraviti. Puno toga, puno toga se može napraviti da nam svima bude bolje. Ja se zaista nažalost u zadnju godinu dana u svom kantonu, u svom gradu osjećam jako nesigurno, možda čak naj nesigurnije evo u svojoj kratkoj životnoj istoriji. I to je mislim činjenica za sve nas. Ali hoću da kažem da me je sramota onako kao građanina Tuzle što još uvijek imamo ovog istog ministra policije. Vjeroučitelja koji svojom biografijom i svojim ponašanjem, ničim ne zaslužuje da bude na takvoj bitnoj poziciji. Mislim da ima imalo morala, imalo poštenja, imalo ljudskosti u sebi, da bi, da bi sam sišao s te pozicije, da ne bi čekao da ga Vlada kantona, odnosno Skupština kantona zamijeni. A isto tako me je sramota što u Skupštini kantona sjedi dvadesetak ljudi, ne znam sad tačno koji je broj, koji smatraju da nema ništa sporno u radu vjeroučitelja na mjestu ministra unutarnjih poslova, koji je mogu slobodno reći izuzetno nekompetentan za tu poziciju.

Toliko od mene. Mi kao Vijeće možemo suditi, možemo se boriti, možemo reći da se nikada nikome ne ponovi, al ono što ne možemo, ne možemo napraviti pravu promjenu i to mi je žao, jer da bogdom mi imamo mogućnosti nekog da smjenjujemo, mislim da bi ovdje svi bili, svi bili za takvu jednu vrstu opcije, jer kada preuzmete odgovornost za funkciju, morate preuzet i odgovornost za svoje rezultate. Ovdje su rezultati ovog gospodina iz vjeroučitelja, očigledno naj nesigurnija situacija u Tuzlanskom kantonu i u Tuzli i ja zaista ne znam otkud mu morala, etike i ljudskosti da ostane na ovoj funkciji. Toliko.

NATAŠA PERIĆ

Hvala kolegi Berbiću. Sljedeća za riječ se javila vijećnica Merima Softić Sprečić. Neka se pripremi vijećnica Esana Kavazbašić Huskanović. Izvolite Merima.

MERIMA SOFTIĆ SPREČIĆ – vijećnik Socijaldemokratske partije

Hvala predsjedavajuća. Pozdravljam sve prisutne.

NATAŠA PERIĆ

Izvinjavam se. Poslovničku je samo Mensur, kolega Alić tražio. Izvolite.

MENSUR ALIĆ – vijećnik Tuzlanske alternative

Pa ja bi zamolio, ovaj, da pustimo, ovaj, porodicu da se obrati ovom Gradskom vijeću (NATAŠA PERIĆ – Hoće. Najavili su se oni). Da što prije da, ovaj, ne gubimo puno vremena, a sve iz njihovih riječi ćemo mi čuti i znamo sve. Da mi puno vijećnici ne oduzimamo vrijeme njima, jer njima je vrijeme, ovaj, danas najvažnije da kažu sve ono što žele da kažu i ono što ih je zadesilo u ovim trenucima da izađu za govornicu i da se oni obrate ovom Gradskom vijeću. (NATAŠA PERIĆ – Oni su...Mi smo se već dogovorili). A onda poslije toga možemo dat zaključke. (NATAŠA PERIĆ – Ne, ne, mi smo već dogovorili. Oni su izrazili želju da se oni na kraju obrate). Dobro. Zbog čekanja samo. Zbog toga sam mislio. (NATAŠA PERIĆ - Ja, znam, znam, pa evo zamoliću samo vijećnike da kratko kaže. Et samo kratko, nemoj...). E, zbog toga, zbog toga sam tražio. Hvala.

NATAŠA PERIĆ

Izvolite Merima.

MERIMA SOFTIĆ SPREČIĆ

Dobro. Pozdravljam sve prisutne. Hvala što ste mi dali riječ. Neću imati pretjeranu dugu diskusiju. Evo uvažavam ovo što je rekao gospodin vijećnik Mensur Alić.

Naime, Amra je zaslužila da se o njoj danas govori. Naša moralna obaveza je da donesemo određene zaključke koje će doprinijeti da se sakncionišu odgovorni, koji su dopustili da dođe do propusta zbog kojeg je službenim pištoljem ubijena naša draga sugrađanka Amra Kahrimanović.

Otrgnuta je nemilosrdno i svirepo, a da nije imala nikakvu šansu da se spasi. Porodici Amre Kahrimanović upućujem svoje iskreno saučešće i dajem punu podršku kao žena, mama, sestra, kao njena sugrađanka, koja će Amrina dobra i plemenita duša mnogo nedostajati.

Svi zajedno trebamo istrajati ovu borbu za pravdu Amre Kahrimanović. Moja puna podrška kao vijećnice ovog Gradskog vijeća. Hvala.

NATAŠA PERIĆ

Hvala Merima. Sljedeća za riječ se javila vijećnica Esana Kavazbašić Huskanović. Neka se pripremi vijećnik Elvir Bijedić. Izvolite.

ESANA KAVAZBAŠIĆ HUSKANOVIĆ

Ja bi se jako složila sa kolegicom Selmom i sa izlaganjem kolege Omera Berbića što se tiče sigurnosne situacije u Tuzli. Mislim, u zadnje vrijeme je vidljiv taj porast i kriminaliteta i svake vrste nasilja i femicida, znači, sve učestalije se to dešava. A šta je razlog tome? Zato što nema mehanizama koji će stati u odbranu bilo koga od nas.

Ja se trenutno jako bojim živjet ovdje. Prva stvar koja me brine, baš zato što je bio policajac. Šta to znači sad? Svaki put kad mi neki policajac priđe ili ja njemu priđem, pa mi uđemo u neku diskusiju, da će on izvadit oružje i pucati u mene? Ko mi to ne garantuje? Zato što oni nisu u stanju sprovesti sistematske preglede, u čiji sastav ulazi psihološka analiza svake osobe koja nosi oružje u sastavu radnog odnosa. Da li je uopšte taj ministar svjestan ko radi za njega? Kako će znati i taj direktor MUP-a Kantona? Kako će on znat ko radi za njega ako oni nemaju psihološko testiranje, a nose oružje?

Svako od nas se treba osjetiti ugrožen. Jeste svjesni u kom pravcu mi uopšte idemo? I šta će nam se desiti za par godina? Pa ovdje će bit totalna anarhija. Ja se brinem za sigurnost svoje djece, jer ne znam ko me pazi. Ne znam kakav je psihički profil tog policajca koji meni prilazi, jer nisu u stanju ga sprovest, a dali smo oružje u ruke. Mi se stvarno moramo intenzivno početi baviti ovim stvarima. Ovo nije normalno.

Jel vi shvatate da je on to uradio gdje prolaze ljudi. Moglo je bit moje dijete tu, pa zalutali metak je ubiti. Zna li da je gore škola? Da su djeca izašla i gledala kako puca u nju. Jeste svjesni šta je on uradio, koliko je to strašno djelo? I onda mi dođe ministar i direktor MUP-a i premijer i prezentuju jednu laž. Pa kako ih nije stid porodice. Jesu oni svjesni da je ta žena nevinna?

Pa hajd da je pucao jedan metak. Pa dva. Pa tri. Al brojte do broja sedamnaest. To je bilo toliko krvoločno urađeno. A tu su ljudi prolazili.

I hajde što su to uradili, već nisu okružili mjesto zločina, već su dopustili slučajnim prolaznicima i djeci odozgo da snimaju i slikaju to tijelo. Znači, nisu imali toliko dostojanstva.

Pa nedo bog da je žena ubila policajca. Pa znate šta bi bilo? Pa to bi u ovom gradu bio haos. Svi bi se digli. Svi. Al ne, pošto je sad suprotna situacija, sad hajmo mi krit. Hajmo lagat. Bit nemoralni. Ići protiv porodice.

Strašno da je uopšte ova porodica, moje iskreno saučešće, dovedena u situaciju da mora u trenutku svoje najveće boli, organizovat proteste, jer ih nema ko štitit. To je nevinna žena u koju je puco policajac sa oružjem sa sedamnest metaka. Preko ovoga se ne može preći. I borićemo se svim silama, jer sigurnost u ovom gradu postaje jako upitna. Ne zbog kriminalaca, već policajaca koji nas trebaju štitit. Toliko od mene.

NATAŠA PERIĆ

Hvala. Sljedeći za riječ se javio vijećnik Bijedić. Neka se pripremi vijećnik Senad Mehmedinović.

ELVIR BIJEDIĆ

Zahvaljujem predsjedavajuća. Ja ću zaista bit vrlo kratak. Izražavam kao građanin i vijećnik ovog Gradskog vijeća duboko saučešće porodici za teško, gnusno ubistvo naše Amre Kahrmanović.

Ono što želim da istaknem jesu dvije stvari. Dakle, poražavajuća mi je bila informacija koju sam čuo od direktora Uprave policije da, ovaj, sistematski pregledi nisu provođeni od 93-e godine, a onda kao šlag na tortu još poražavajuće, još više poražavajuće kad kaže ministar da su započeli sistematske preglede, pa su ih prekinuli, zato što su se uplašili da će ostati bez kadra. Pročitao sam to par puta. Prosto ne mogu da vjerujem. Šokiran sam, dakle, tom informacijom.

Ono što želim kao vijećnik da predložim ovom Gradskom vijeću jeste zaključak od kojeg mi kao Gradsko vijeće insistiramo, ne tražimo, nego insistiramo od Vlade Tuzlanskog kantona, da se iznađu sredstva i da se intenzivno počne raditi na sistematskim pregledima svih pripadnika Ministarstva unutrašnjih poslova grada Tuzle. Da, naravno, hvala kolegice Esana, dakle, uključujući naravno prije svega i psihološko testiranje. Zahvaljujem.

NATAŠA PERIĆ

U redu. Hvala. Sljedeći za riječ se javio vijećnik Senad Mehmedinović. Neka se pripremi vijećnica Selma Čatibušić.

SENAD MEHMEDINOVIĆ

Poštovana predsjedavajuća, zamjeniče predsjedavajuće, sekretaru, vijećnici, predstavnici službi, porodico Kahrmanović, primite iskreno saučešće za ovo što se desilo.

Vi znate da smo mi kao Vijeće prije tri godine donijeli rezoluciju protiv nasilja i imamo mi u ovoj našoj ljepoj Bosni i Hercegovini zakonske i podzakonske akte. Međutim, to je samo nažalost slovo na papiru.

Pored Tuzle ovo što se desilo, ne smijemo mi zaboraviti u proteklu godinu dana, možda godinu i po dana, imamo Lipnicu nedavno ubistvo, imamo Gradačac nedavno ubistvo, imamo ubistvo nedavno u Krojčici. Dakle, to sve govori o osobama ženskog spola koje su izgubile živote.

Ja podržavam porodicu Kahrmanović, naročito u onom dijelu u kojem se traži, mislim da mi kao Vijeće trebamo to da podržimo, da ministar MUP-a u najmanju ruku iz moralnih razloga treba da podnese ostavku i da se povuče sa tog mjesta koje obnaša.

Mislio sam isto da predložim zaključak koje je kolega Elvir, a to je da obavezno se mora uraditi sistematski pregled unutar Ministarstva unutrašnjih poslova. Poseban aspekt na psihološko testiranje.

I još jedan bi prijedlog zaključka dao, a to je da pripadnici Ministarstva unutrašnjih poslova urade i testiranja na psihoaktivne supstance. Hvala.

NATAŠA PERIĆ

Jel to to? (SENAD MEHMEDINOVIĆ – To je to). Ok. Sljedeća za riječ se javila vijećnica Selma Ćatibušić. Neka se pripremi vijećnik Šefik Husić.

SELMA ĆATIBUŠIĆ

Veoma kratko. Klub vijećnica Platforme za progres podržava inicijativu kolege Elvira Bijedića sa dopunom kolege Senada.

Samo želimo ukoliko se oni slažu da dopunimo inicijativu, odnosno, je li, davanje podrške za obezbjeđivanje u što hitnom postupku svih ljekarskih pregleda svih pripadnika Ministarstva unutrašnjih poslova, ali da se dopuni i u tom dijelu da će se organizovati redovni psihološki tretmani sa pripadnicima svih policijskih uprava Tuzlanskog kantona. U smislu da to ne bude samo ljekarski pregled koji će se organizovati tipa u mjesecu julu i to je to.

Da, činjenica da dosta policajaca se suočava sa svakak...svakodnevnim ono pojavama i stresom na poslu i vide sve i svašta i PTSP i slično. I smatramo da mora postati praksa da i oni imaju je li i svoje psihologe koji će redovno raditi s njima i koji će moći da ukoliko primijete određene pojave i situacije, ono što se dešava kod njih u njihovom je li, na njihovom psihološkom zdravlju moći reagovati.

Ono što također smatram da je jako važno jeste da se u svakoj lokalnoj zajednici u Tuzlanskom kantonu zapravo dostave informacije ko će i na koji način vršiti također te ljekarske preglede. Nažalost svjedoci smo da se ti tenderi, na koji način se dobijaju i kako to sve funkcioniše, da to ne bude neko pro forme, da je dobio neki tender, da se to ne odradi na nivou kako bi to trebalo i moralo da bude, nego da će svakoj lokalnoj zajednici da se dostavi informacija o tome. Hvala.

NATAŠA PERIĆ

Hvala Selma. Sljedeći za riječ se javio vijećnik Šefik Husić. Neka se pripremi vijećnica Medina Lolić. Izvolite.

ŠEFIK HUSIĆ – samostalni vijećnik

Evo ja vas sve pozdravljam. Izvinjavam se ovaj iz objektivnih razloga sam kasnio i to sam javio predsjedavajućoj. Porodici Kahrimanović želim da izjavim žaljenje. Jako teška i bolna situacija. Šta god da čovjek kaže iz ove pozicije običnog čovjeka nije dovoljno. Malo je.

Međutim, slušam sve ove diskusije i slušam u proteklom periodu jako puno diskusija o tome, a duži period, znači, nekoliko godina već pokušavam napraviti neku subjektivnu analizu u svojoj glavi o svim ovim dešavanjima.

Nažalost jako puno se ovdje govori o jednom parcijalnom problemu. Mislim na samo policijske strukture ili Ministarstvo unutarnjih poslova. Međutim, kroz ono čime se ja bavim i što gledam svakodnevno i ono na osnovu čega sam bazirao znači tu subjektivnu analizu je da mi kao društvo smo puno obolili. Znači, puno obolili. Ne radi se samo o tome, znači, da imamo ekcese u policiji, da imamo ekcese u nekim tim kao što sam rekao parcijalnim sredinama. Radi

se o globalnom. Znači, o globalnom društvu i mislim da većinu nas ovdje u Vijeću ako bi uradili psihoanalizu, vjerovatno bi nam nešto dijagnostikovali.

Ono u šta sve kroz ove diskusije slušajući se pretvara, pretvara se znači u politizaciju, nažalost, znači, cijelog slučaja. Mi imamo sugrađanku koja je ubijena. Koja je brutalno ubijena. O tome, iz toga se evo skoro cijelo vrijeme, osim prva dva dana, znači, skida akcenat.

Šta je uzrok svemu tome? Uzrok tome je znači sistemski problem koji je vezan, evo prvo krenućemo od Doma zdravlja Tuzla. Molim vas ako može malo pažnje. Govorim o nekim stvarima koje su znači sa jednog stručnog aspekta i gdje je cijelo društvo odgovorno. Cijelo društvo. Ja kad neko diskutuje, znači, uglavnom slušam. Znači, ovdje se radi o sistemskom problemu gdje je zakazalo društvo.

Krenućemo od primarne zdravstvene zaštite koja nema više nikakvu funkciju. Nikakvu funkciju. Imamo, znači, Službu za psihološku zaštitu u sklopu primarne zdravstvene zaštite u Domu zdravlja Tuzla koja ne funkcioniše.

Lažno solidarni, uglavnom branimo aktere, znači, onda kad je potrebno da reaguju. Znači i psihologe i socijalne radnike i defektologe, znači i psihijatre u sklopu Doma zdravlja koji vrati čovjeka, koji se obrati za psihološku potporu. Znači, vrati se taj čovjek i pusti se na ulicu. Nemamo nikakvu kontrolu. Znači, imamo jedan globalni problem.

Evo u centru grada, znači, gledamo godinama. Razvija se znači ono što uništava djecu ovog društva. I mi to podržavamo. Odavdje iz ovog Vijeća su odlazili raznorazni prijedlozi, znači, da dopustimo da se razvijaju ti nargila barovi u kojima su nađeni analizom u Zavodu za javno zdravstvo amfetamini. Narkotici.

Znači, hajmo govorit o, o...šta mi treba da predložimo o sistemskom rješenju. Imamo bolesnu, znači, psihički bolesnu populaciju i kažem vam hajmo napraviti analizu evo da mi budemo eksperiment. Nek nas prvo psihološki testiraju. Ovdje u Vijeću. Poslušajte malo svaki put diskusije. Znači, imamo jako veliki problem.

Slažem se da treba sankcionisat sve koji su doprinijeli propustima. Al to nije samo na jednom mjestu. To je puno širi problem u koji mi ne govorimo. Ovdje najčešće govorimo o raspodjeli određenih sredstava. O tome kako ćemo pokriti onaj neke stvari koje su možda manje bitne od ovoga šta se dešava. (NATAŠA PERIĆ – Kolega Husiću, isteklo vam je. Pet minuta je rasprava vijećnika). Hvala.

NATAŠA PERIĆ

Hvala vama. Replika. Vijećnik Elvir Bijedić. Kome?

ELVIR BIJEDIĆ

Kolegi prethodniku Šefiku Husiću.

Dakle, ja ne želim da, ovaj, da na ovaj način ide tok diskusije. Dakle, ovdje želim jasno da se ogradim. Nikakva politizacija. Apsolutno ne. Dakle, govorim, dakle, u svoje vlastito lično ime.

Subjektivni osjećaj kakav imate naravno to je osjećaj koji vi možete zadržat za sebe, međutim, objektivno jeste da je situacija u gradu Tuzli, ubistvo Amre Kahrmanović značajno ugrožena.

Dalje. Ja sam potpuno saglasan s tim da provedemo i psihološko testiranje svih nas. Međutim, kolega Husiću, mi ne nosimo oružje po službenoj dužnosti. Ono na čemu ja insistiram i zaključak koji sam ja predložio ovom Gradskom vijeću jeste da sistematski pregledi inteziviraju se, dakle, evo i kako su kolege rekle sa osvrtom na psihološko testiranje, zato što ti ljudi nose oružje. Dakle, i to je potencijalna opasnost, kao što smo vidjeli nažalost u slučaju i ubijene Amre Kahrmanović.

Dakle, ne želim da ide u ovom pravcu. Niokakvom politiziranju nije riječ. Mi ovdje jednostavno moramo da budemo konstruktivni da uputimo značajne zaključke tamo na mjesta gdje to treba da bude da ove stvari preveniramo i da se ovakve stvari ne dešavaju. Hvala.

NATAŠA PERIĆ

Molim vas samo da ne bude puno replika, da ne odemo u nekom desetom pravcu, ovaj, već imamo tri još replike. Vijećnica Esana Kavazbašić Huskanović. Pa Selma. Pa Šefik. Idemo redosljedom.

ESANA KAVAZBAŠIĆ HUSKANOVIĆ

Prvo što bi rekla kolegi ovo što je rekao ovaj Elvir (NATAŠA PERIĆ – Kome replicirate?). Njemu. (NATAŠA PERIĆ – Kome?). Husiću Šefiku. Ovaj, ovdje nema nikakve politizacije. Znači, ovo je nešto čisto ljudsko. Ja imam četiri kćerke kod kuće, za koje se jako osjećam nesigurno i smatram da već kad policija nosi oružje, da treba bit psihološki testirana. Dal sam ja luda il nisam, to nema veze s tim. Ja ne nosim oružje. Oni ga nose.

Druga stvar. Ja sam imala par inicijativa za zatvaranje nargila barova. Ja nikad nisam bila za nargila bar, jer mi nije normalno da dijete od 14, 15 godina sjedi u nargila baru i puši to. Baš iz tog razloga što je dokazano da to jako šteti zdravlju djece, jer imaju enormno povećanje karcinoma usne i svega (NATAŠA PERIĆ – Molim vas, samo na temu se vratite. Ovo je replika. Molim vas). Važi. Replika za ove nargila barove.

Tri godine mi radimo protiv nasilja. Ne može nam neko reći evo sad se nešto desilo pa mi smo akteri. Čitavo vrijeme ovo Vijeće sa svojim inicijativama, sa svojim vijećničkim pitanjima, sa prijedlozima, pokušava nešto promijeniti i prevenirati bilo koju vrstu nasilja u Tuzli. I borit ćemo se još uvijek. Možete vi imat bilo kakvo mišljenje o nama. Al mi stojimo iza toga.

NATAŠA PERIĆ

Hvala. Vijećnica Selma Ćatibušić. Replika. Pa onda Šefik Husić.

SELMA ĆATIBUŠIĆ

Replika kratka kolegi Husiću i neću više da skrećem s teme. Mislim da je ovo na neki način vrijeđanje porodice, al iskreno kolega Husiću, malo je ironično govorit o primarnoj zdravstvenoj zaštiti i nefukncionisanju Doma zdravlja, a onda sa dvije ruke podržati izvještaj Doma zdravlja.

Onaj, tako da, da slažemo se da i zdravstvena situacija pogotovo ova za koju smo mi nadležni, tj. primarna zdravstvena zaštita je svakako u rasulu, al, onaj, onda ne možemo da podržavamo takve stvari, nego trebamo ustati protiv toga. Et toliko.

I molim takođe poslanička da se vratimo svi na temu i da...

NATAŠA PERIĆ

Pa evo ja pozivam, ja sam već rekla, molim vas nemojte da idemo sad u nekom pogrešnom pravcu. Ovdje je jedan cilj, što kaže kolegistica Kavazbašić Huskanović, jedan ljudski čin, a ne da idemo sad ovo prelazi u političko već prepucavanje. (MENSUR ALIĆ – Upozorio sam). Pa znam, al ja ne mogu nikom zabranit, a ja sad samo ljudski kažem, molim vas nemojte da idemo sad da se prepucavamo.

Vijećnik Husić. Izvolite. Replika. Kome samo?

ŠEFIK HUSIĆ

Replika kolegi Bijediću, kolegici Esani i kolegici Selmi.

NATAŠA PERIĆ

Dobro. Izvolite.

ŠEFIK HUSIĆ

Znači, kolegi Bijediću. Ne znam koliko ste upoznati, mislim da ovdje nekoliko vijećnika ima dozvolu za nošenje oružja, a mislim da isto tako određen broj ilegalno nosi oružje, tako da ne stoji vam ova, onaj i s tim se neću složiti.

Kolegica Esana. Znači, nisam apsolutno imao bilo kakvu intenciju, samo sam rekao o globalnom problemu koji ja, onaj, analiziram već duži niz godina. Ono šta ste vi učinili, znači, za zaštitu žena na ovom području, recite nam, onaj, lično. I šta vi činite svojim primjerom u društvu, onaj, da bi, da bi, da bi zaštitili žene? (NATAŠA PERIĆ – Molim vas malo tišine).

I treće ovo za izvještaj Doma zdravlja. Radi se o finansijskoj izvještaju Doma zdravlja, koji kroz onu dokumentaciju koju dobijemo, znači, je predstavljen, onaj, tako kako je predstavljen, onaj i normalno da ćemo podržat, da ta ustanova funkcioniše. A evo na kraju krajeva imamo izmjene neke u Domu zdravlja. Nadam se da će uroditi plodom.

NATAŠA PERIĆ

Sljedeća za riječ se javila Medina Lolić. (MEDINA LOLIĆ – Evo ovako). Aha. Ispravka krivog navoda Elvir Bijedić. Izvinite, ovaj, Medina, molim vas. (MENSUR ALIĆ – Poslovnička). Poslovnička. Vijećnik Mensur Alić. Izvolite.

MENSUR ALIĆ

Zamolio bi kolegice i kolege da se vratimo dnevnom redu. Sramota je danas na ovakvoj tački dnevnog reda koja je predložena od strane jedne vijećnice da imamo replike. To je na sramotu svima nama. Umjesto da traje diskusija ovdje ukupno pola sata da se završi (NATAŠA PERIĆ – Pročitaju zaključci), na najbolji način, a da vidimo na koji način možemo mi i svojim zaključcima pomoć u daljem rasvjetljavanju svih događaja kad je u pitanju, ovaj, ubistvo u gradu Tuzla i šire.

Osnovno, molim ponovo vijećnike da ne repliciraju jedni drugima. Sramota je ovo što radimo. Mene kao čovjeka je sramota. Ne mogu ja ovdje sad porodici, ovaj, žalopojku svoju, ja znam kako je njima. Oni su izgubili svoje najdraže.

Dajmo, budimo bar na ovome, kao kolege i kolegice, budimo jedni prema drugima, uvažavajmo jedni druge, jer inače mi smo kao društvo moralno pali i treba nam godinama da se vratimo na prvobitno stanje. Hvala.

NATAŠA PERIĆ

Ispravka krivog navoda Elvir Bijedić.

ELVIR BIJEDIĆ

U potpunosti se slažem sa gospodinom Mensurom Alićem. Međutim, znate kad, ovaj, dobijete situaciju da neko kaže da je ovo politiziranje, jednostavno ne mogu da ostanem gluh niti slijep na takvu situaciju.

Dakle, ja moram da ispravim navode gospodina Šefika Husića. Ko nosi oružje legalno ili ilegalno u gradu, pa i u ovom Gradskom vijeću, mene stvarno ne zanima. To postoje institucije koje izdaju i institucije koje će to provjeravati.

Međutim, ono što je činjenica da mi to oružje ne zadužujemo kad krećemo na sjednice Vijeća, a policija ga zadužuje kad kreće na teren, niti ga mi ne razdužujemo, odnosno razdužimo ga kad završimo sjednicu Gradskog vijeća.

Dakle, mi nemamo regularno obavezu da nosimo pištolje kolega Husiću za razliku od policije koja evo i ne razdužuje kada ide na godišnje odmore. Hvala.

NATAŠA PERIĆ

Sljedeća za riječ se javila Medina Lolić. Neka se pripremi vijećnik Ćerim Rastoder.

MEDINA LOLIĆ – samostalni vijećnik

Evo ovako. Prije svega bi da pozdravim sve prisutne u sali i želim, ovaj, iskreno saučešće da izjavim porodici naše drage Alme, Amre. Lično sam je poznavala. Bila je divna žena. Prava dama. Žena sa stavom. Žena sa gardom. I često razmišljam kako je taj monstrum mogao da ispali sedam metaka u le...sedamnaest u leđa jedne žene, tako reć, takve žene. I onda razmišljam možda taj njen stav njega natjerao na takvo nešto. Možda mu je bio povrijeđen ego.

Nažalost želim da podržim, kao žena, da se više nikad ne dese ovakve stvari i naravno svi oni koji su odgovorni, da odgovaraju za ovo, ovaj zločin ili ovo krivično djelo. Eto. Hvala vam.

NATAŠA PERIĆ

Hvala Medina. Sljedeći za riječ se javio vijećnik Ćerim Rastoder. Neka se pripremi vijećnik Hirkić.

ĆERIM RASTODER - zamjenik predsjedavajućeg Gradskog vijeća Tuzla, - samostalni vijećnik –

Zahvaljujem se predsjedavajuća. Nastojacu da budem kratak. Prije svega želio bi iskreno saučešće da izjavim porodici Kahrmanović.

Slažem se da je dobro što disk...što smo ovu tačku dnevnog reda uvrstili, da se mi kao građanski vijećnici, kao, ovaj, ispred grada Tuzle očitujemo po ovom pitanju i slažem se sa svim ovim diskusijama i sa svim replikama koje se, malo se i politizira, al nije to potrebno i nema potrebe, onaj, da radimo na tome.

Mi smo država koja je bila prije 30 godina u ratu. Dobar dio nas građana, vijećnika, poslanika i tako dalje i policajaca je učesnik rata i htjeli mi to priznat ili ne, onaj, u dobroj mjeri kod većine nas ima tog ratnog sidroma, koji je iz godinu u godine sve izraženiji. Kako ulazimo u godine, tako izraženiji. I mi smo neću reć oboljelo društvo, ali dobrim dijelom. I ja smatram, onaj, da bi naravno ovo je poražavajuća činjenica, kada čujemo da neki organi sigurnosti kao što je policija, vojska i tako dalje, a i u oružanim snagama je slična situacija, nemaju redovne

sistemske ljekarske preglede, detaljne, na osnovu koje bi mogli produžiti službu, zadužiti naoružanje i tako dalje. Ali isto tako, onaj i naravno, ovaj, stava sam da se to mora raditi, da se mora iznaći sredstva, ali isto tako ne bi bilo loše i mislim da bi mi kao društvo trebali posvetiti pažnju i ostalim, onaj, strukturama. Ostalim osobama. Na primjer, mi evo sad primamo u radni odnos higijeničarku, tražimo ljekarski pregled i tako dalje. Dobro bi bilo da se razmisli, vjerovatno će to viši nivoi vlasti, ovaj, nekad i raspravljati, da možda odavdje potekne inicijativa da i za sva lica koja obnašaju javne funkcije, trebaju imati određene vrste ljekarskih pregleda, jer onaj ko je poslanik u Skupštini, Parlamentu, državi, donosi zakone, možda bude član predsjedništva, niko od njega ne traži ljekarski pregled. Znači, za sve javne osobe i one koje rade na šalteru, koje rade sa ljudima i tako dalje, treba u određenom vremenskom periodu obaviti određen sistematski pregled, da vidimo dal je ta osoba, onaj, može raditi taj posao, može komunicirati taj posao, jer ona predstavlja državu. Svi mi koji radimo, onaj, na neki način ko obavljamo neke položaje, neke funkcije, mi moramo imati neku vrstu ljekarskog pregleda. Ne mora to biti naoružanje vezano za oružje, tako da, onaj, po mom mišljenju trebalo bi u tom kontekstu razmišljati. Znači, svi, ko evo i mi ovdje, znači, vijećnici, tako da možda bi i u izbornom zakonu ne bi bilo loše da lice koje želi da aplicira na bilo koju poziciju, počev od vijećnika pa do državnog parlamenta predsjedništva, da prethodno, onaj, obavi ljekarski pregled, da nam se ne bi ove stvari dešavale. Znači, sve je to specifično za naše društvo. U mnogim zemljama evrope i svijeta, ti ljekarski pregledi su neminovni prije nego što se stave na listu za bilo koju poziciju. Znači, u tom kontekstu kažem. Evo. Tolko. Hvala. Još jednom saučeešće porodici.

NATAŠA PERIĆ

Hvala. Vijećnik Hirkić. Izvolite. Neka se pripremi vijećnik Jovanović.

HASIB HIRKIĆ

Zahvaljujem predsjedavajuća. Evo drugi put se javljam. S obzirom da smo izašli iz rata koji je ostavio znači nesagledive posljedice na društvo. Ali ako pričamo da je društvo bolesno, onda moramo poduzeti sve neophodne korake za rješavanje problema, pa bi možda predložio jedan zaključak.

S obzirom da imamo veliki broj ljudi koji imaju poslije ratni sindrom PTSP, a nose oružje, vozačke dozvole, znači, mi smo svaki dan u opasnosti, pa da porodični ljekari, psiholozi, psihijatri dostave nadležnima svu potrebnu dokumentaciju, pa da se prema takvim licima postupi u skladu sa propisima, zakonima i svim drugim mogućim rješenjima, kako bismo evo i na taj način pokušali smanjiti u budućnosti ovakve slučajeve. Mislim da, da, da ako već nešto pričamo, a nećemo direktno da kažemo, u stvari, ja se slažem u potpunosti sa prethodnicima da ima puno takvih ljudi koji to imaju oružje kod sebe, da imaju vozačke dozvole, ali niko nema hrabrosti da kaže. Treba reći šta treba poduzeti da bismo riješili probleme u društvu. Ja ne znam čega se oni boje. Svojih nalogodavaca. Hajdemo čistiti društvo. Ako treba da čistimo, čistimo. I evo predlažem da prvo od mene krenu. Neki dan sam završio sve preglede i evo spreman sam ponovo da idem. Pa evo nek krene od nas Gradskog vijeća. Pa hajmo dalje. Hvala.

NATAŠA PERIĆ

Hvala. Vijećnik Zoran Jovanović Izvolite.

ZORAN JOVANOVIĆ

Hvala predsjedavajuća. Pa evo iskreno saučešće porodici. Slučaj je stvarno zaprepastio mnoge i u Tuzli i izvan Tuzle i čak su prenosili i svjetski mediji. Ali evo danas pričamo o ovome. Mislim da je u vezi ovog pitanja kad se dese ovakvi slučajevi, trebala se održati vanredna sjednica Gradskog vijeća hitnog karaktera.

Pričali smo o slučaju u Gradačcu. Sedam, osam dana svi su nešto rekli i kraj. Zaboravili. Evo bila Lipnica i ne spominje se. Malo je ovdje veći pritisak javnosti zbog ubistva Amre, ovaj, pa se još ovo malo priča i vremenom će vrijeme faktor da se nešto zaboravi. Neće njena porodica.

Ništa nije urađeno sistematski. Slažem se sa diskusijom kolege Husića. Moramo se baviti uzrocima da bi spriječili posljedice ljudi. Ovdje je problem. Nije problem više ovoga čovjeka koji je u policiji bio i ima šezdeset godina ili pedesetpet. Takvoga je napravilo društvo i sistem. I što neko kaže ovdje, ovaj, možda i među nama ima nekih sa manama koji će možda nekad eksplodirati na ulici. Nismo više sigurni. Sistem je kriv. Znači, treba raditi od onog obdaništa, da nam se ne dešavaju ovakva nedjela i u obdaništima i u osnovnoj školi. Samo pričamo o vršnjačkom nasilju. Niko ne poduzima konkretne mjere.

Mi odavdje ovo što reče Ćerim, ovaj, zakon je propisao kolektivni ugovor u svim granama. Sistematske preglede za sve zaposlene. Mi možemo odavdje samo tražiti, to postoji, propisano. Mi imamo odlične zakone u Bosni i Hercegovini. Nažalost oni se ne poštuju. Ako postoji za običnog građanina obaveza odlaganja oružja u onaj sef metalni u stanu njegovom, moralo je to biti i u policijskoj stanici. Tamo postoje ti pravilnici, propisi, nije se neko držo, znači, to je, to je, ovaj, po meni propust koji je krivično djelo. I ovo da vam ne dozvoli poslodavac da obavite sistematski pregled, iako je zakonom propisano kolektivnim granskim ugovorom. Za pojedine zaposlenike svakih šest mjeseci, za neke godina, za državne službenike svake dvije godine. Ko je od nas iz državne službe otišao na sistematski pregled koji je platio poslodavac? Nije niko. Ljudi samo izračunaju koliko je to novaca i kažu, ma kakav sistematski pregled, nema veze što će biti belaja poslije tog.

A slažem se s diskusijom Šefika Husića da moramo nekako reagovati u razvoju, znači, sistem da radi, da se ovo spriječi. Pa kaže, vidite, onaj, ja zvao lično tamo, ovaj, komšija mi poludio, nešto zove me njegova žena, kaže daj molim te policiju i hitnu i dođu, odvedu čovjeka, onaj, u hitnu, odvedu ga gore u Solinu i puste ga nazad. Kaže ne možemo ga, nije napravio ništa, al bez njegove saglasnosti ga ne možemo ostaviti na Psihijatriji, u Psihijatrijskoj bolnici. Kakav je to zakon? I on dođe meni na vrata što sam ja zvao policiju i mene upuca. Znači, i zato ljudi bježe od tih stvari. Ne žele se miješati.

Mi možemo odavdje, možda moj prijedlog zaključka da tražimo da Federalna uprava policije koja vodi istragu u vezi ovog ubistva, što prije završi istragu i dostavi nalaz javnosti na uvid, pa da vidimo ko je kriv. Hvala.

NATAŠA PERIĆ

Hvala Zorane. Esana, jeste vi javili još jednom?

ESANA KAVAZBAŠIĆ HUSKANović

Znači, da bi skratili ovu sjednicu, a mi imamo jako puno problema koje trebamo rješavati i razgovarati o njima, ovaj, ja bi jedan zaključak.

Da Gradsko vijeće organizuje tematsku sjednicu sigurnosnog stanja u gradu Tuzla, gdje bismo pozvali ministra, direktora policije i porodicu i da onda čitav, napravimo pravu raspravu

i da svi dobiju riječ i da svi razgovaramo otvoreno o tome, al da je ministar prisutan tu i da je direktor MUP-a kantona prisutan tu. (NATAŠA PERIĆ – Dobro). Et. To je moj...

NATAŠA PERIĆ

Zaključujem...(vijećnik Zoran Jovanović govori bez uključenog mikrofona op.a). Molim? Hajd. (vijećnik Zoran Jovanović govori bez uključenog mikrofona op.a). Uključite se vi.

ZORAN JOVANOVIĆ

Ministar je političko lice. Nama je ovdje jako bitan komandir Policijske uprave Tuzla. On je ovdje koji odgovara za bezbjednost grada Tuzle.

NATAŠA PERIĆ

Dobro. Nemojte dobacivat. Molim vas.

Zaključujem raspravu vijećnika.

Prije nego što se izjasnimo o zaključcima, molim pauzu.

Dajem pauzu, pardon 10 minuta, tamo da se dogovo...Ne, ne. Porodica ide poslije zaključaka. (MENSUR ALIĆ - Nemojte tako. Molim vas). Pa tako smo se dogovorili. (MENSUR ALIĆ – Dajte porodici neka izađu, pa na osnovu toga, njihovog izlaganja ćemo imat, moći napraviti zaključak). Al napravili smo ih. Ne može. Ne može, sačekajte malo. Pa kršimo poslovnik. Zaključila sam raspravu. Znači, ovdje su zaključci proistekli iz rasprave. Ja radim sad po redoslijedu.

Znači, mi sad treba da se izjasnimo o ovim zaključcima, a nakon toga se je izrazio želju sin Amre Kahrmanović samo kratko da se obrati. Eto, neće ništa. Znači, ja ne mogu kršiti poslovnik. (Pauza).

Pozivam vijećnike da uđu u salu da se izjasnimo o zaključcima.

Zamoliti ću sekretara da pročita zaključke proistekle iz diskusija i predlažem da glasamo u paketu.

SLADANA KRAJINA – sekretar Gradskog vijeća Tuzla

1. Povodom monstruoznog ubistva naše sugrađanke Amre Kahrmanović od strane pripadnika Ministarstva unutrašnjih poslova, koji ju je na zvjerski način usmrtio, ispalivši 17 metaka u leđa žrtve, Gradsko vijeće Tuzla izražava svoje duboko saučešće porodici i prijateljima nastradale Amre.

2. Gradsko vijeće Tuzla takođe izražava saučešće porodici i prijateljima mučki ubijene sugrađanke Selme Baluković.

3. Gradsko vijeće Tuzla osuđuje monstruozan čin ovih i drugih ubistava, koji su se desili na području Tuzlanskog kantona, te upućuje preporuku nadležnim organima, da počiniocima efikasno i u skladu sa zakonom procesuiraju i sankcionišu.

4. Preporučuje se Vladi i Skupštini Tuzlanskog kantona, kao i članovima Nezavisnog policijskog odbora, da pokrenu procedure utvrđivanja odgovornosti svih onih, koji su u lancu zapovijedanja načinili propust i omogućili policajcu na godišnjem odmoru da neovlašteno drži i upotrebljava oružje.

5. Preporučuje se Vladi i Skupštini Tuzlanskog kantona i MUP-u Tuzlanskog kantona, da preduzmu mjere iz svoje nadležnosti za kadrovsko i materijalno jačanje MUP a Tuzlanskog kantona, kako bi isti bio u funkciji zaštite svih građana, a prvenstveno nemoćnih i žena.

6. Gradsko vijeće Tuzla urgira na realizaciji nerealizovanih zaključaka, usvojenih na tridesetoj redovnoj sjednici Gradskog vijeća Tuzla, održanoj 31. avgusta 2023. godine, kada je upućen zahtjev nadležnim organima za poduzimanje hitnih mjera na suzbijanju nasilja, torture i uznemiravanja svih osoba a naročito žena i razmatrana Informacija o aktivnostima Grada Tuzle na prevenciji nasilja nad ženama i podršci ženama žrtvama nasilja, a koji su glasili: Pod 1. Gradsko vijeće Tuzla poziva nadležne institucije da reaguju s dužnom pažnjom i da preduzimaju sve neophodne mjere propisane Konvencijom Vijeća Europe o sprečavanju i borbi protiv nasilja nad ženama i nasilja u obitelji (Istanbulskom konvencijom), kako bi se spriječili budući slučajevi femicida, ali i svi oblici nasilja nad ženama i djevojčicama, bilo kog oblika torture i nasilja u porodici.

Drugi zaključak: Gradsko vijeće Tuzla apeluje na nadležne pravosudne i druge državne organe da budu efikasniji u procesuiranju i izricanju sankcija za krivična djela protiv života i tijela, čije su žrtve žene i nemoćna lica.

3. Gradsko vijeće Tuzla traži od nadležnih vlada i parlamenata da se izradi i usvoji tekst izmjena Krivičnog zakona, kojim će femicid biti predviđen kao posebno krivično djelo.

4. Gradsko vijeće Tuzla traži od Vijeća ministara Bosne i Hercegovine i entitetskih vlada i Vlade Brčko Distrikta Bosne i Hercegovine da, u skladu sa svojim nadležnostima, pristupe izradi dokumenata vezanih za definisanje sveobuhvatnog okvira politika i mjera za zaštitu i pomoć svim žrtvama nasilja i torture nad ženama, uznemiravanja žena i nasilja u porodici.

5. Gradsko vijeće Tuzla traži od nadležnih organa da poduzmu hitne mjere na suzbijanju nasilja, torture i uznemiravanja svih osoba a naročito žena.

6. Gradsko vijeće Tuzla traži od Gradske uprave Grada Tuzla i od javnih ustanova i javnih preduzeća čiji je osnivač ili suosnivač Grad Tuzla da dostavi informaciju o tome da li posjeduju podatke odnosno informaciju da li su njihovi zaposlenici nekada bili prijavljeni za nasilje te da li postoje osuđujuće presude za nasilje protiv lica koja su zaposlenici Gradske uprave, javnih preduzeća i javnih ustanova čiji je osnivač ili suosnivač Grad Tuzla kao i da li je nekom od zaposlenika dat otkaz zbog osuđujuće presude za nasilje odnosno da li su spremni dati otkaz onim zaposlenicima, ukoliko takvih ima, koji su počinili nasilje.

7. Gradsko vijeće Tuzla će pokrenuti inicijativu za implementaciju odnosno realizaciju pravljenja parka za sve žrtve femicida.

8. S ciljem aproksimacije podataka o oblicima nasilja nad ženama, Gradsko vijeće Tuzla traži od Ministarstva za ljudska prava i izbjeglice Bosne i Hercegovine da, u saradnji sa Agencijom za statistiku i Agencijom za ravnopravnost spolova (a u skladu sa Krivičnim zakonom), izradi sveobuhvatnu i razvrstanu statistiku o nasilju nad ženama, u skladu sa Istanbulskom konvencijom.

9. Gradsko vijeće Tuzla traži od RTV7 da pripreme i distribuiraju portalima i medijskim kućama, u odgovarajućem obliku i formatu, sugestije na koji način izvještavati javnost kada je u pitanju nasilje, ubistvo ili druga krivična djela, poštujući nečije pravo na privatnost kao i principe novinarske etike.

10. Gradsko vijeće Tuzla traži od nadležnih službi da, prilikom kreiranja nacrta budžeta Grada Tuzla za 2024. godinu, povećaju novčana sredstva na ekonomskom kodu - Grant za Udruženje Viva Žene Tuzla, a sve u skladu sa finansijskim mogućnostima.

11. Gradsko vijeće Tuzla sugeriše Javnoj ustanovi za predškolski odgoj i obrazovanje "Naše dijete" Tuzla da, u saradnji sa resornim službama, pokušaju iznaći odgovarajući model gdje će psiholozi obavljati razgovore sa djecom koja u najranijoj dobi pokazuju određene oblike agresivnosti te napraviti pravovremeni skrining.

12. Gradsko vijeće Tuzla sugerije da se razmotre zakonske, finansijske i faktičke mogućnosti subvencioniranja angažovanja psihologa u privatnim predškolskim ustanovama.

13. Gradsko vijeće Tuzla sugerije da se razmotre zakonske, finansijske i faktičke mogućnosti subvencioniranja kurseva samoodbrane žena koji bi se održali u mjesnim zajednicama na području grada Tuzle.

14. Gradsko vijeće Tuzla traži od Službe za boračko-invalidsku zaštitu, stambene poslove i integraciju raseljenih lica da dostavi informaciju da li je ijedna žrtva nasilja u porodici aplicirala za dodjelu stana u zakup.

15. Gradsko vijeće Tuzla traži od Ministarstva unutrašnjih poslova Tuzlanskog kantona i od Policijskih uprava da poduzmu sve aktivnosti u cilju dodatnog educiranja policijskih službenika za postupanje sa žrtvama nasilja, imajući u vidu činjenicu da su policijski službenici, u većini slučajeva, prve osobe kojima se žrtve nasilja obraćaju i od kojih očekuju pomoć i podršku, na način da im se posebna pažnja skrene na to da je potrebno da žrtve nasilja detaljno upoznaju sa svim pravima koja imaju kao i da im pruže podršku u vidu davanja što više potrebnih informacija koje su važne za dalju sigurnost i rješavanje nastale situacije kao i pravnu i faktičku zaštitu žrtve, mogućnost zbrinjavanja u Sigurnoj kući, naročito ako su tu i maloljetna djeca, koja često ostanu u kući sa nasilnikom pa se žrtva nasilja, ukoliko joj se ne pruži adekvatna podrška, vraća nasilniku.

Znači, ovo su zaključci sa avgustovske sjednice i tražit ćemo realizaciju samo onih koji nisu realizovani.

I dalje zaključci današnji.

7. Grad Tuzla će, u skladu sa svim svojim kapacitetima, nastaviti sa aktivnostima na prevenciji nasilja nad ženama i podršci ženama žrtvama nasilja te će o poduzetnim aktivnostima pravovremeno informisati Gradsko vijeće.

8. Gradsko vijeće Tuzla sugerije gradonačelniku i nadležnim gradskim službama da razmotre mogućnost izgradnje parka sjećanja na žrtve nasilja, uz konsultaciju sa porodicama žrtava i udruženjima koja se bave zaštitom od nasilja.

9. Gradsko vijeće Tuzla sugerije gradonačelniku i resornim službama da se razmotre mogućnosti za realizaciju inicijativa podnesenih u toku trajanja mandata ovog mandata Gradskog vijeća vezanih za sjećanje na žrtve nasilja.

10. Gradsko vijeće Tuzla insistira od Vlade Tuzlanskog kantona da se obezbjede finansijska sredstva i da se intenzivno započne sa provođenjem redovnih i vanrednih sistematskih pregleda pripadnika policijskih snaga koji će uključiti i psihološko testiranje kao i testiranje na psihoaktivne supstance te da se organizuju redovni psihološki tretmani za pripadnike policijskih snaga u cilju blagovremenog otkrivanja eventualnih psihičkih problema i njihovog pravovremenog tretmana.

11. Gradsko vijeće Tuzla traži od Federalne uprave policije da što hitnije završi postupak istrage u vezi sa tragičnim događajem od 07. februara 2024. godine, kada je na naročito brutalan način lišena života Amra Kahrmanović i da o rezultatima istrage upozna javnost.

12. Gradsko vijeće Tuzla traži od ljekara porodične medicine, psihologa i psihijataru da, na osnovu uvida u kartone oboljelih od PTSP-a, a koji imaju dozvole za nošenje oružja i vozačke dozvole, podatke prosljede nadležnim organima radi preduzimanja određenih mjera u skladu sa propisima.

13. Gradsko vijeće Tuzla traži od Vlade Tuzlanskog kantona i Gradske uprave Grada Tuzla da sinhronizovano djeluju na prevenciji, kroz sistem zdravstvene zaštite sa akcentom na psihijatrijske službe.

14. Gradsko vijeće Tuzla apeluje na pravosudne organe da brže i efikasnije djeluju u rješavanju ovakvih slučajeva.

15. Gradsko vijeće Tuzla sugeriše Kolegiju Gradskog vijeća Tuzla da razmotri mogućnost održavanja tematske sjednice Gradskog vijeća Tuzla na temu bezbjedonosne situacije u gradu Tuzla.

NATAŠA PERIĆ

U redu. Molim vijećnike da se izjasne o pročitanim zaključcima. Glasanje je okončano. Konstatujem da su pročitani zaključci usvojeni sa, 28 glasova za, nije bilo protiv i nije bilo suzdržanih.

Ja sad pozivam sina naše sugrađanke Amre Kahrmanović Damira Hodžića da nam se obrati pošto je izrazio želju. Izvolite Damire ovdje.

DAMIR HODŽIĆ

Dobar dan svima. Kao što svi već nažalost znate ja sam Damir Hodžić sin Amre Kahrmanović vaše sugrađanke, jedne jako, jako vrijedne, čestite, poštene i lijepe žene, savršene majke koja mi je oduzeta, koja je ubijena na jedan ja-ko, ja-ko monstruozan, svirep i brutalan način od strane policajca MUP-a TK. Od strane države. Od strane sistema. Od strane državnog pištolja iz kojeg je u nju ispaljeno i u nju...Nju je pogodilo šesnaest metaka. Da li ste vi svjesni toga da je moja majka nedužno ubijena? Sve se to vjerovatno moglo spriječiti da su se poštovala i provodile već ranije propisane procedure i pravila. Dakle, ta pravila i procedure postoje unutar MUP-a TK. I ptice na grani znaju da ih oni nisu provodili. Vi to svi ovdje znate, a to vrlo dobro znaju oni u MUP-u. Neću puno trošiti riječi na MUP TK.

Ja i moja porodica smo od prvog dana jasno i precizno iznijeli naše zahtjeve i naše molbe koje se odnose na moralnu odgovornost i na ostavku ili smjenu, ako već ne postoji ta moralna odgovornost i empatija ministra MUP-a TK i direktora MUP-a TK. Ovo nije nikakva politička konotacija. Mene ne zanima iz koje je stranke ministar iz koje stranke je direktor. Moja majka nije bila pripadnik ni jedne stranke niti sam ja, niti nas to interesuje. U pitanju je jedan ljudski život ljudi. Da li ste vi svjesni toga?

Neću pričati ni o detaljima ubistva jer mi je jako teško, ja-ko, ja-ko teško i bolno pričati o tome i siguran sam da svi već znate, da ste već upoznati sa svime.

Danas sam došao samo sa jednom namjerom a to je da se obratim vama Gradskim vijećnicima, ljudima koji predstavljaju narod, koji su glas naroda, koji su glas, koji su bili glas moje majke, koji su moj glas. Želim da vas zamolim da se uputi inicijativa da se mojoj majci dodjeli po mogućnosti neki trg, ulica ili park po njenom imenu u znak sjećanja na nju, na njen lik i na njena dobra djela koja su ostala iza nje i da to služi svima kao podsjetnik i opomena da to ne smije više nikada, takav propust više nikada ne smije da se ponovi i to ne smije nikada da se zaboravi. I ja vam garantujem da se to neće nikada zaboraviti, ja vam to obećavam svima. Ja ću se pobrinuti za to. I od prvog dana se borim da se naš glas čuje i mi ćemo istrajati u našoj borbi. To vam ja sad svima obećavam.

Sistem, sistem više nikada ne smije zakazati na ovaj način. Ovakav propust se nikada više ne smije desiti da jedan policajac, govorim o ovom slučaju, ikada više ubije i jednu nedužnu žrtvu. Ovo se ne odnosi samo na moju majku, na mene i na moju porodicu. Ovo se odnosi na sve vas ovdje prisutne. I vi...i vas je rodila sve majka. Odnosi se na budućnost vas i vaše djece.

Amra je bila dijete Tuzle i odrasla je u samom centru grada u Turalibegovoj ulici. Ja ne znam kako funkcionišu ove procedure i kako funkcionišu te dodjele, ali ja bih želio da vam iznesem moju ideju, ideju moje porodice. Mi imamo na umu da park u Turalibegovoj ulici dobije ime po njoj jer je ona i odrasla u kući preko puta tog parka i kao mala, kao dijete se

igrala u tom parku zajedno sa svojim bratom i sa svojim drugaricama. Još jedan od razloga zašto mi želimo da to bude baš taj park i zelena površina je taj razlog što je moja majka jako, jako puno voljela cvijeće i prirodu. Što je uvijek imala najljepšu ljetnu baštu, najljepše cvijeće, najljepši vrt pored njenog kafića koja je u stvari jedna mala javna površina koju je ona godinama, deceniju sama održavala, kosila, sadila cvijeće, čistila od smeća i tako dalje. Ja i moja porodica bismo se pobrinuli i naravno pomogli Javnom preduzeću „Komunalac“ da taj park uvijek bude besprijekorno čist, uredan i održavan. Smatram da je to nešto najmanje što grad i država može da učini za moju majku i za svoju sugrađanku i to moju rahmetli majku i vi svi ovdje prisutni mi možete pomoći u tome. To je za vas samo jedan običan glas za, jedan pritisak na taster.

Iskreno se nadam da će politika ovaj put biti ostavljena po strani za razliku od prošlog puta na Sjednici Skupštine Vlade TK gdje su nas na jedan jako, jako bolan način izigrali. Tome ste svi mogli posvjedočiti, mogli ste vidjeti one glasove. Ja sam zbog toga danas i došao ovdje jer se iskreno nadam i vjerujem da ćete vi svi kao Gradski vijećnici podržati mene u ovome. Hvala vam.

NATAŠA PERIĆ

Hvala. Evo u ime Gradskog vijeća i u svoje lično ime još jednom izražavamo saučesće vama i vašoj porodici. (DAMIR HODŽIĆ – Hvala.) Eto. Pauza 10 minuta. (Pauza.)

Molim vijećnike da uđu u salu nastavljamo sa radom.

Evo ovako. Sad na pauzi je zasjedao vanredni Kolegij. Mi smo slušajući prijedlog porodice ubijene Amre Kahrmanović da jedan park u Turalibegovoj dobije naziv po njoj razmatrali ovu inicijativu i složili smo se, odnosno podržali smo ovu inicijativu koju ćemo dalje uputiti pošto je to proceduralno mora proći neke Službe, odnosno Komisije i nakon toga kad ove nadležne Komisije to realizuju, odnosno odrade onda to ide na Gradsko vijeće. Tako et samo da vas upoznamo tako.

A porodici evo...Mislom hvala vam i što ste došli. Evo mi smo stvarno vas podržali u svemu i et mi sad nastavljamo sa našim daljim radom.

Tačka dva. Pardon.

Tačka tri:

RAZMATRANJE I USVAJANJE ODLUKE O PRISTUPANJU IZRADI URBANISTIČKOG PROJEKTA DIJELA PROSTORNE CJELINE „STARI GRAD“, „TABAŠNICE - ATIK MAHALA“ U TUZLI.

Predlagač: gradonačelnik Grada Tuzle.

Obrađivač: Služba za prostorno uređenje i zaštitu okoline i Upravna organizacija Zavod za urbanizam.

Materijal su razmatrali: Komisija za statutarna pitanja i propise, Komisija za prostorno uređenje i zaštitu okoline i klubovi vijećnika. Doviđenja. Prijatno. Prijatno.

Da li ima potrebe za uvodnim izlaganjem? (Nema.)

Da li ima potrebe da se pročitaju izvještaji komisija? (Nema.)

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika. Vijećnik Omer Berbić. Izvolite.

OMER BERBIĆ

Ja ću vrlo kratko a predlažem zaključak da ovo Gradsko vijeće evo sugerije u izradi ovog plana da se proba negdje naći prostor za formiranje stare drvene čaršije po uzoru onako slično Bašćaršiji hajde da kažemo stare drvene čaršije koja je nekada krasila upravo ovo područje dijela grada i da vidimo da li to može biti na gradskoj zemlji i da napravimo to gdje bi vratili stare zanate. Napravili jedno mjesto gdje bi vratili stare zanate i probali oživjeti dio grada kroz tu takvu jednu vrstu inicijative. Toliko. Hvala.

NATAŠA PERIĆ

Dobro. Hvala Omere. Da li se još neko javlja?

Ako ne zaključujem raspravu vijećnika i stavljam na izjašnjavanje ODLUKU O PRISTUPANJU IZRADI URBANISTIČKOG PROJEKTA DIJELA PROSTORNE CJELINE „STARI GRAD“, „TABAŠNICE - ATIK MAHALA“ U TUZLI i molim vijećnike da se izjasne. (vijećnica Esana Kavazbašić Huskanović govori bez uključenog mikrofona op.a.) Ne može. Poništavam glasanje. Ništa...U redu je samo nemojte da...Nemojte. Ajde sad ponovo glasamo. Glasanje je okončano

Konstatujem da je ODLUKA O PRISTUPANJU IZRADI URBANISTIČKOG PROJEKTA DIJELA PROSTORNE CJELINE „STARI GRAD“, „TABAŠNICE - ATIK MAHALA“ U TUZLI usvojena sa,

23 glasa za, nije bilo protiv i nije bilo suzdržanih.

Tačka četiri:

RAZMATRANJE I USVAJANJE (SLAĐANA KRAJINA – Zaključak.) A izvinjavam se. Zaključak Omera Berbića.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla sugerije predlagачu i obrađivaču materijala da se razmotri mogućnost izgradnje stare drvene čaršije na ovom području sa starim zanatima, koja je nekada krasila ovaj dio grada i koja bi ga sada ponovo oživjela.

NATAŠA PERIĆ

Molim vijećnike da se izjasne o pročitanoj zaključku. Glasanje je okončano.

Konstatujem da je pročitani zaključak usvojen sa,

24 glasa za, nije bilo protiv i nije bilo suzdržanih.

Tačka, tačka četiri:

RAZMATRANJE I USVAJANJE ODLUKE O PRISTUPANJU IZRADI REGULACIONOG PLANA PROSTORNE CJELINE „TOPOLICA“ U TUZLI.

Predlagач: gradonačelnik.

Obrađivač: Služba za prostorno uređenje i zaštitu okoline i Upravna organizacija Zavod za urbanizam Tuzla.

Materijal su razmatrali: Komisija za statutarna pitanja i propise, Komisija za prostorno uređenje i zaštitu okoline i klubovi vijećnika.

Imal potrebe za uvodnim izlaganjem? (Nema.)
 Imal potrebe da se pročitaju izvještaji komisija? (Nema.)
 Otvaram raspravu klubova vijećnika. (Nema niko.)
 Zatvaram raspravu klubova vijećnika.
 Otvaram raspravu vijećnika. Sabiha Mujkanović Mujačić.

SABIHA MUJKANović MUJAČIĆ

Zahvaljujem. Dakle, odmah da napomenem da shvatam da je ovo ODLUKA O PRISTUPANJU IZRADI REGULACIONOG PLANA PROSTORNE CJELINE „TOPOLICA“ U TUZLI ali ono što mene zanima a vidimo da prostor obuhvata dvije buvlje pijace. Znamo da su te pijace izvor sredstava za život brojnih naših sugrađana. Ono što mene zanima je da se već tamo pojavila neka priča da bi mogla doći do izmještanja pijaca.

Zanima me da li postoje već neke informacije o tome i da li se zna nešto o tome ili ćemo čekati Odluku o izradi regulacionog plana? Eto.

NATAŠA PERIĆ

Dobro. Da li još ima neko od vijećnika? (Nema.) Ako ne.

Zaključujem raspravu vijećnika i molim evo nekog ispred Službe ili iz Zavoda da da odgovor. Evo direktorica Zavoda za urbanizam Selma Imamović. Izvolite.

SELMA IMAMOVIĆ - direktorica Zavoda za urbanizam Tuzla

Dobar dan, pozdravljam sve prisutne. Mi takva saznanja nemamo, ovaj, naravno da će se projekcijom izgradnje Regulacionog plana, odnosno uređenja te prostorne cjeline predvidjeti izgradnja nečeg drugog najvjerojatnije. Međutim, ono što je u fokusu jeste saobraćajna povezanost, znači, izgradnja kružnog toka koji bi povezao naselje Stupine sa transferzalom T 8 i jedan dio tog kružnog toka koji je već ranije usvojen u našim planskim dokumentima zauzima i jedan dio lokacije Buvlje pijace. Međutim, nemamo podatke u ovom momentu o vlasničkom stanju. Znamo posjednovno. Tako da ni jedan plan se ne može realizirati dokle god vlasnik nekretnine ne želi realizaciju tog dijela planskog dokumenta.

NATAŠA PERIĆ

Hvala Selma. Hvala.

Stavljam na izjašnjavanje ODLUKU O PRISTUPANJU IZRADI REGULACIONOG PLANA PROSTORNE CJELINE „TOPOLICA“ U TUZLI i molim vijećnike da se izjasne.

Konstatujem da je ODLUKA O PRISTUPANJU IZRADI REGULACIONOG PLANA PROSTORNE CJELINE „TOPOLICA“ U TUZLI usvojena sa,
 25 glasova za, nije bilo protiv i nije bilo suzdržanih.

Tačka pet:

RAZMATRANJE I USVAJANJE POD:

a) **DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“**

b) **ODLUKE O PROVOĐENJU DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“**

c) ODLUKE O IZMJENAMA I DOPUNAMA ODLUKE O PROVOĐENJU IZMJENE REGULACIONOG PLANA PROSTORNE CJELINE „STUPINE“ U TUZLI I

d) ODLUKE O USVAJANJU DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“.

Predlagач: gradonačelnik.

Obrađivač: Služba za prostorno uređenje i zaštitu okoline i Upravna organizacija Zavod za urbanizam Tuzla a materijal su razmatrali: Komisija za statutarna pitanja, Komisija za prostorno uređenje i zaštitu okoline i klubovi vijećnika.

Ima potrebe za uvodnim izlaganjem? (Nema.)

Ima potrebe da se pročitaju izvještaji komisija? (Nema.) Nema.

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika i stavljam na izjašnjavanje DRUGU IZMJENU DIJELA OBUHVATA „IZMJENE REGULACIONOG PLANA (SLAĐANA KRAJINA – Hoćete u paketu ili...?) U paketu.

ODLUKE O PROVOĐENJU DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“

c) ODLUKE O IZMJENAMA I DOPUNAMA ODLUKE O PROVOĐENJU IZMJENE REGULACIONOG PLANA PROSTORNE CJELINE „STUPINE“ U TUZLI

ODLUKE O USVAJANJU DRUGE IZMJENE DIJELA OBUHVATA „IZMJENE REGULACIONOG PLANA PROSTORNE CJELINE „STUPINE“ U TUZLI“ i molim vijećnike da se izjasne. Glasanje je okončano.

Konstatujem da je pročitana IZMJENA DIJELA OBUHVATA IZMJENE REGULACIONOG PLANA PROSTORNE CJELINE „STUPINE“ U TUZLI“ i pročitane odluke usvojene sa,

19 glasova za, nije bilo protiv i 3 suzdržana.

Prije nego što pređemo na šestu tačku Dnevnog reda dajem pauzu od 30 minuta. (Pauza.)

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik -**

Sedamnest? Dobro.

Nastavljamo, nastavljamo dalje sa radom. Tačka šest.

Tačka šest:

RAZMATRANJE I USVAJANJE POD:

a) ODLUKE O RASPISIVANJU JAVNOG OGLASA ZA IZBOR I IMENOVANJE PREDSJEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“ TUZLA ČIJI JE OSNIVAČ GRAD TUZLA (SA TEKSTOM JAVNOG OGLASA)

POD b)...(NATAŠA PERIĆ – Čerime nemamo kvoruma.) Pa vi rekoste sedamnest. Evo ih na balkonu slušaju oni. (NATAŠA PERIĆ – Ne mogu slušat moraju sjesti.) Tačno nemamo. (NATAŠA PERIĆ – Eto ih idu. Jel ima? De izbrojte sad.) Anele? (NATAŠA PERIĆ – Ima sedamnest.)

Nastavljamo tačka znači šest:

POD a) je rečeno. POD

b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE PREDSEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“ ČIJI JE OSNIVAČ GRAD TUZLA I POD

c) RJEŠENJA O IMENOVANJU KOMISIJE ZA IZBOR PREDSEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“ ČIJI JE OSNIVAČ GRAD TUZLA

Predlagач: gradonačelnik.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanje pod c) i klubovi vijećnika.

Da li ima potrebe da se čitaju izvještaji? (Nema.) Dobro.

Da li ima...? Otvaram raspravu klubova vijećnika. (Nema.) Hvala.

Zatvaram raspravu klubova vijećnika.

Otvaram raspravu vijećnika. (Nema.) Hvala.

Zatvaram raspravu klubova vijećnika. (NATAŠA PERIĆ – Vijećnika.) Vijećnika pardon i predlažem evo s obzirom da nije bilo diskusija da glasamo za sve tri pod a) i b) i c) istovremeno.

Znači, pod a) ponovo da pročitamo. Odluke...(SLAĐANA KRAJINA – Možete konstatovati kad bude se glasalo konstatujem da je sa toliko glasova pa onda pročitajte.) Dobro. I da prelazimo na glasanje, znači (SLAĐANA KRAJINA – Sve podtačke.) za a), b) i c). Hvala. (Imal kvoruma?) (SLAĐANA KRAJINA – Ima kvoruma...) Ima, ima. Dobro. Hvala.

Konstatujem da je sa,

20 vijećnika za, nije bilo protiv ni suzdržanih usvojena ODLUKA O RASPISIVANJU JAVNOG OGLASA ZA IZBOR I IMENOVANJE PREDSEDNIKA I ČLANOVA UPRAVNOG ODBORA JAVNE USTANOVE TUZLANSKA RAZVOJNA AGENCIJA „TRAG“, POD

b) ODLUKA O RASPISIVANJU JAVNOG OGLASA ZA IZBOR I IMENOVANJE PREDSEDNIKA I ČLANOVA ODBORA JAVNE USTANOVE TUZLANSKE RAZVOJNE AGENCIJE „TRAG“ I POD

c) RJEŠENJE O IMENOVANJU KOMISIJE ZA IZBOR PREDSEDNIKA I ČLANOVA UPRAVNOG ODBORA JAVNE USTANOVE TUZLANSKE RAZVOJNE AGENCIJE „TRAG“ sa 20 glasova, znači nije bilo suzdržanih niti protiv. Hvala lijepo.

Idemo na tačku redni broj sedam:

RAZMATRANJE I USVAJANJE POD:

a) RJEŠENJA O RAZRJEŠENJU PREDSEDNIKA UPRAVNOG ODBORA - PREDSTAVNIKA OSNIVAČA JAVNE ZDRAVSTVENO - NASTAVNE USTANOVE DOM ZDRAVLJA „DR. MUSTAFA ŠEHOVIĆ“ TUZLA, POD

b) ODLUKE O RASPISIVANJU JAVNOG OGLASA ZA IZBOR I IMENOVANJE PREDSEDNIKA UPRAVNOG ODBORA - PREDSTAVNIKA OSNIVAČA U JAVNOJ ZDRAVSTVENO - NASTAVNOJ USTANOVI DOM ZDRAVLJA „DR. MUSTAFA ŠEHOVIĆ” TUZLA, ČIJI JE OSNIVAČ GRAD TUZLA (SA TEKSTOM JAVNOG OGLASA), POD

c) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE PREDSEDNIKA UPRAVNOG ODBORA - PREDSTAVNIKA OSNIVAČA JAVNE ZDRAVSTVENO-NASTAVNE USTANOVE DOM ZDRAVLJA „DR. MUSTAFA ŠEHOVIĆ” TUZLA, ČIJI JE OSNIVAČ GRAD TUZLA I POD

d) RJEŠENJA O IMENOVANJU KOMISIJE ZA IZBOR PREDSEDNIKA UPRAVNOG ODBORA- PREDSTAVNIKA OSNIVAČA U JAVNOJ ZDRAVSTVENO - NASTAVNOJ USTANOVI DOM ZDRAVLJA „DR. MUSTAFA ŠEHOVIĆ” TUZLA, ČIJI JE OSNIVAČ GRAD TUZLA

Predlagatelj je gradonačelnik.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanje i klubovi vijećnika.

Da li ima potrebe za uvodno izlaganje? (Nema.) Dobro.

Otvaram raspravu klubova vijećnika. (Nema.) Hvala.

Zatvaram raspravu klubova vijećnika.

Otvaram raspravu vijećnika. Vijećnik Berbić.

OMER BERBIĆ

Predsjednik Upravnog odbora je otišao za direktora RTV 7 jel tako? Ovaj, pa evo to mi je čisti dokaz politizacije svih javnih ustanova, preduzeća itd. kada možemo na taj način prebacivati ljude iz, s jednog mjesta na drugo i mislim da je ovo upravo razlog zbog čega uvijek na svaki Javni konkurs, svaki Javni poziv kada popunjavamo Upravni nadzorni odbor se jave isti ljudi ili imamo samo jednog ili dva kandidata. I na žalost, ne ulazim sad u kvalifikacije kandidata koji je otišao sa, sa predsjednika Upravnog odbora na mjesto direktora, ali želim da kažem da ovakav način političkog postavljanja nikad nikome nije ništa dobro donjeo pogotovo jer ovdje govorimo o Upravnom odboru Doma zdravlja. Politizacija zdravstva nažalost donosi rezultate kakve donosi. Samo sam to želio da kažem ništa, ništa drugo. Hvala lijepo.

ĆERIM RASTODER - zamjenik predsjedavajućeg

Gradskog vijeća Tuzla,

- samostalni vijećnik -

Zahvaljujem kolega Berbiću.

Ima još? (Nema.) Dobro.

Ako nema predlažem da i po ovoj tački glasamo istovremeno za a), b), c) i d) pa evo da pređemo na glasanje pa ću ja posle glasanja navest za šta smo glasali. Hoćemo poništiti? (SLAĐANA KRAJINA – Poništi.) Poništavamo. (SLAĐANA KRAJINA – Nema, nema Anela a glasano je.) (NATAŠA PERIĆ – Ne, ne Ana je greškom.) Dobro. Idemo ponovo. Dobro. Glasanje je okončano.

Konstatujem da je, da su usvojeni sa 22 glasa, bez, nije bilo protiv niti suzdržanih sledeća akta i rešenja, rešenje.

POD a) RJEŠENJE O RAZRJEŠENJU PREDSEDNIKA UPRAVNOG ODBORA - PREDSTAVNIKA OSNIVAČA JAVNE ZDRAVSTVENO - NASTAVNE USTANOVE DOM ZDRAVLJA „DR. MUSTAFA ŠEHOVIĆ“ TUZLA, POD

b) ODLUKU O RASPISIVANJU JAVNOG OGLASA ZA IZBOR I IMENOVANJE PREDSEDNIKA UPRAVNOG ODBORA - PREDSTAVNIKA OSNIVAČA U JAVNOJ ZDRAVSTVENO - NASTAVNOJ USTANOVU DOM ZDRAVLJA „DR. MUSTAFA ŠEHOVIĆ“ TUZLA, ČIJI JE OSNIVAČ GRAD TUZLA,

POD c) ODLU...(SLAĐANA KRAJINA – Sa tekstom, sa tekstom...) SA TEKSTOM JAVNOG OGLASA u zagradi jel? ODLUKA,

POD c) ODLUKA O UTVRĐIVANJU POSEBNIH USLOVA I KRITERIJA ZA IZBOR I IMENOVANJE PREDSEDNIKA UPRAVNOG ODBORA - PREDSTAVNIKA OSNIVAČA JAVNE ZDRAVSTVENO-NASTAVNE USTANOVE DOM ZDRAVLJA „DR. MUSTAFA ŠEHOVIĆ“ TUZLA, ČIJI JE OSNIVAČ GRAD TUZLA I POD

d) RJEŠENJE O IMENOVANJU KOMISIJE ZA IZBOR PREDSEDNIKA UPRAVNOG ODBORA- PREDSTAVNIKA OSNIVAČA U JAVNOJ ZDRAVSTVENO - NASTAVNOJ USTANOVU DOM ZDRAVLJA „DR. MUSTAFA ŠEHOVIĆ“ TUZLA, ČIJI JE OSNIVAČ GRAD TUZLA.

Prelazimo na tačku osam Dnevnog reda:

RAZMATRANJE I USVAJANJE POD:

a) **ODLUKE O RASPISIVANJU JAVNOG OGLASA ZA IZBOR I IMENOVANJE ČLANA NADZORNOG ODBORA U JAVNO KOMUNALNOM PREDUZEĆU „KOMUNALAC“ D.O.O. TUZLA, ČIJI JE OSNIVAČ GRAD TUZLA u zagradi (SA TEKSTOM JAVNOG OGLASA), POD**

b) **ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA I POD**

c) **RJEŠENJA O IMENOVANJU KOMISIJE ZA IZBOR ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA**

Predlagač: gradonačelnik grada Tuzle.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija Mirele za izbor i imenovanje pod c) i klubovi vijećnika.

Da li ima potrebe za uvodnim izlaganjem? (Nema.) Dobro. Hvala.

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika. (Nema.) Dobro. Hvala.

Zatvaram raspravu klubova vijećnika. (NATAŠA PERIĆ – Vijećnika.) Vijećnika i predlažem da se izjasnimo po navedenim tačkama. Molim vas glasajte. Dobro. Glasanje je okončano.

Konstatujem da je 22 vijećnika je bilo za, nije bilo suzdržanih niti, niti protiv za RAZMATRANJE I USVAJANJE POD:

a) **ODLUKE O RASPISIVANJU JAVNOG OGLASA ZA IZBOR I IMENOVANJE ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA u zagradi (SA TEKSTOM JAVNOG OGLASA), POD**

b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA I POD

c) RJEŠENJA O IMENOVANJU KOMISIJE ZA IZBOR ČLANA NADZORNOG ODBORA U JKP „KOMUNALAC“ D.O.O. TUZLA, ČIJI JE OSNIVAČ GRAD TUZLA.

Prelazimo na tačku devet Dnevnog reda:

RAZMATRANJE I USVAJANJE POD:

a) **ODLUKE O DODJELI U ZAKUP POSLOVNIH PROSTORIJA NEPOSREDNOM POGODBOM JAVNA USTANOVA TUZLANSKA RAZVOJNA AGENCIJA “TRAG” TUZLA, POD**

b) **ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA VELLAS DOO SREBRENİK, POD**

c) **ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA CRVENI KRIŽ/KRST GRADA TUZLA I POD**

d) **ODLUKE O RASPISIVANJU JAVNOG OGLASA O DAVANJU U ZAKUP POSLOVNIH PROSTORIJA.**

Predlagač: gradonačelnik grada Tuzle.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo i klubovi vijećnika.

Da li ima potrebe za uvodno izlaganje? (Nema.) Dobro. Hvala.

Otvaram raspravu klubova vijećnika. Dobro.

Zatvaram raspravu klubova vijećnika.

Otvaram raspravu vijećnika. (Nema.)

Zatvaram raspravu vijećnika i predlažem da istovremeno glasamo za sve tačke. Molim vas pristupite glasanju. Glasanje okončano.

Konstatujem da je sa 22 glasa za, nije bilo protiv niti suzdržanih da su usvojena sledeće odluke.

POD a) **ODLUKA O DODJELI U ZAKUP POSLOVNIH PROSTORIJA NEPOSREDNOM POGODBOM JAVNOJ USTANOVİ TUZLANSKA RAZVOJNA AGENCIJA “TRAG” TUZLA, POD**

b) **ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA VELLAS DOO SREBRENİK, POD**

c) **ODLUKE O DAVANJU SAGLASNOSTI NA ZAKLJUČENJE UGOVORA O ZAKUPU POSLOVNE PROSTORIJE SA CRVENI KRIŽ/KRST GRADA TUZLA I POD**

d) **ODLUKE O RASPISIVANJU JAVNOG OGLASA O DAVANJU U ZAKUP POSLOVNIH PROSTORIJA.**

Tačka deset: (NATAŠA PERIĆ – Možel malo tišine?) Selma? (vijećnik Omer Berbić govori bez uključenog mikrofona op.a.) Pa ne mogu tebe Omere stalno opominjat pa zato. Šalimo se malo. Idemo dalje.

Znači, tačka deset:

RAZMATRANJE I USVAJANJE IMOVINSKO PRAVNIH AKATA POD:

a) ODLUKE O UTVRĐIVANJU JAVNOG INTERESA ZA IZGRADNJU TRANSFORMATORSKE STANICE KSF6 10(20)/0,4 KILOVATA „PLAVA POLIKLINIKA“ SA PRIKLJUČNIM 10 (20) KILOVATA KABLOM U NASELJU SLAVINOVIĆI U TUZLI, POD

b) ODLUKA O POVJERAVANJU NEKRETNINA U VLASNIŠTVU GRADA TUZLA NA UPRAVLJANJE I KORIŠTENJE JAVNOM KOMUNALNOM PREDUZEĆU „SAOBRAĆAJ I KOMUNIKACIJE – TUZLA“ D.O.O. TUZLA, POD

c) ODLUKE O PRODAJI NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA, POD

d) RJEŠENJE O IMENOVANJU KOMISIJE ZA PROVOĐENJE POSTUPKA PREGOVARANJA ZA PRODAJU NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA, POD

e) ODLUKA O OPTEREĆENJU ZEMLJIŠTA PRAVOM GRAĐENJA NA LOKALITETU POSLOVNE ZONE „KREKA SJEVER“ U TUZLI PUTEM JAVNOG NADMETANJA – LICITACIJE (S TEKSTOM JAVNOG OGLASA) u zagradi, POD

f) RJEŠENJE O IMENOVANJU KOMISIJE ZA PROVOĐENJE JAVNOG OGLASA O OPTEREĆENJU ZEMLJIŠTA PRAVOM GRAĐENJA NA LOKALITETU POSLOVNE ZONE „KREKA SJEVER“ U TUZLI PUTEM JAVNOG NADMETANJA – LICITACIJE

Predlagач je gradonačelnik grada Tuzle.

Obrađivač: Služba za geodetsko i imovinsko-pravne poslove.

Materijal su razmatrali: Komisija za statutarna pitanja i propise, Komisija za ekonomske odnose, Komisija za prostorno uređenje i zaštitu okoline, Komisija za poduzetništvo pod e) i f), Komisija za izbor i imenovanje pod d) i f) i klubovi vijećnika.

Da li ima potrebe za uvodno izlaganje? (Nema.)

Da li ima potrebe da se pročitaju izvještaji komisija? (Nema.) Dobro.

Prelazimo na raspravu klubova vijećnika. Dobro. Zahvaljujem se.

Prelazimo na raspravu vijećnika. Vijećnik Kapidžić.

ALEN KAPIDŽIĆ

Hvala. Pa mene, evo ja ću postaviti pitanje ovdje u vezi ove tačke c). Znači, ODLUKA O PRODAJI NEKRETNINE U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA. Vi se sjećate da sam ja masu puta na Kolegiju, dok sam bio član Kolegija postavio pitanje ovog Regulacionog plana Hendek. Ovdje u ovom dokumentu tačno je nepiše koja je to parcela. Mislim, piše izvod iz k.č., k.č. broj jel? Na osnovu toga se ni ne vidi gdje je, ovaj, ali evo ja sam se raspitao u toku sjednice Vijeća i došao sam do informacija, a sjećate se da sam na i na jednoj od sjednica čak uputio inicijativu za izmjenu Regulacionog plana. Naravno to nije ništa, ovaj, ni, niti odgovoreno na to, niti šta urađeno po tom pitanju. Sa-d sam dobio informaciju da je ovaj Regulacioni plan istekao je rok jel, i mi sad, pazite ovdje nekoj firmi iz Srebrenika. Ja neću čitat ime, ne interesuje me stvarno, ako možete da me razumijete ne želeći da ugrozim ničije pravo je li? Mene interesuje samo ovdje u članu 2. piše da se ova parcela jel prodaje radi oblikovanja građevinske parcele za

izgradnju kolektivno stambenog, stambeno-poslovnog objekta koju građevinsku parcelu shodno urbanističko-tehničkim uslovima iz Rješenja o urbanističkoj saglasnosti. Vidite, mi smo tražili tad, ja sam tražio da se Regulacioni plan mijenja iz razloga što je našim sugrađanima privatnu parcelu stavljen, predviđen gradski park. On u tom slučaju od svo-je već postojeće kuće koja i postoji na toj parceli ne može čak ni da je sruši i izgradi istu u istim dimenzijama zašto mu ništa u svijetu ništa ne treba jer već ima dozvole sve. A sad prodajemo dio gradskog zemljišta radi oblikovanja građevinske parcele i gradnje stambeno-poslovnog objekta. Sad može. E sad vas ja molim vas pitam kako je ovo moguće i jel ovo moguće i pod kojim uslovima, znači, pod kojim uslovima? I u redu ako je moguće evo recite mi da je moguće. Al zašto ne možemo onda sklonit gradski park sa privatnog vlasništva? Evo samo nek mi neko iz Službe odgovori. Hvala.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Zahvaljujem se vijećniku Kapidžiću. Vijećnik Berbić.

OMER BERBIĆ

Hvala ljepo. Ja ću se ovdje referisat na ODLUKU O OPTEREĆENJE ZEMLJIŠTA, OVAJ, U „KREKI SJEVER“. Što se tiče konkretno Kreke da li su...Ove lokacije ja sam uspio da ih pogledam prije dva dana. Ne mogu se tačno sjetit jer ne mogu da nađem gdje sam zapisao. Al me zanima informacija da li su ovo parcele koje su već bile izdate nekom pa ljudi nisu sagradili ili su ovo parcele koje nisu bile izdate, odnosno nove parcele gdje su riješeni imovinsko-pravni odnosi? Ovo pitam iz prostog razloga što me zanima da li je ikada ikome naplaćen penal iz ugovora? Jer kada firma zaključi valjda ugovor sa Gradom Tuzla da će napraviti fabriku u našoj industrijskoj zoni trebali biti neki penali ukoliko se to ne ispostavi jer ta firma onda zauzme godinu ili godinu i po dvije dana parcelu koju onda samo kasnije vrati. Ete te dvije stvari me zanimaju iz prostog razloga što ako nije tako to bi trebali stavljati ovdje jer ja se sjećam da smo mi više puta davali pravo ljudima za građanje i nekim firmama tuzlanskim koje glume milionere itd., ali onda nam dođe na Gradsko vijeće ista parcela se pojavi da opet dajemo pravo građenju, odnosno da se obustavi taj postupak. Zato et te, te dvije stvari me zaniju. Da li su znači, nove parcele gdje su riješeni imovinsko-pravni odnosi?

I druga stvar me naravno zanima da li smo mi naplatili ikada ikakve penale s obzirom da ljudi nisu gradili na parcelama koje smo mi njima izrentali? Fala ljepo.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Zahvaljujem se kolegi Berbiću. Imal još diskutanata?

Ako nema molim predstavnika Službe za geodetsko i imovinsko-pravne poslove prije nego što glasamo po ovoj tački da pokuša dati odgovore na diskusije dvojice kolega vijećnika. Znači, pojašnjenje daje šef Službe za geodetske i imovinsko– pravne poslove Jasmina Šimleša.

**JASMINA HASANEFENDIĆ – ŠIMLEŠA - pomoćnik gradonačelnika za Službu za
geodetske i imovinsko– pravne poslove**

E hvala vam. Poštovani vijećnice i vijećnici Gradskog vijeća Tuzla, predsjedavajuća, dopredsjedavajući, sekretar Gradskog vijeća Tuzla ja ću...bojim se da neću moći, ovaj, vijećniku Kapidžiću dati onaj odgovor koji, kojim obuhvata čitavo njegovo pitanje ali ponovit ću ovo su znači, postupci neposredne pogodbe kada investitor graditelj stiče pravo kupovine zemljišta neposrednom pogodbom na osnovu pravosnažnog Rješenja o urbanističkoj saglasnosti, odnosno u svrhu formiranja građevinske parcele što je predviđeno Zakonom o stvarnim pravima. Dakle, da istina je da postoji pravosnažna urbanistička saglasnost za izgradnju ovog objekta i da je on investitor time stekao pravo da otkupi dio zemljišta koje je obuhvaćeno tom građevinskom parcelom. Dakle, ono što je predviđeno Regulacionim planom ukoliko on postoji, ja evo nisam sigurna, to će znati bolje kolege iz drugih nadležnih službi, ako je ova građevina obuhvaćena Regulacionom planom, ako je istekao kao što ste sad rekli Regulacioni plan, ovaj, te uslove određuje nadležna služba. Dakle, ne mogu u potpunosti odgovoriti na vaše pitanje koje ste postavili jer evo ja nisam nadležna za te stvari. Dakle, Služba za geodetske nije nadležna za te stvari.

Što se tiče pitanja uvežanog vijećnika Berbića. Dakle, ovdje se radi i o parcelama...Na jednoj parceli su u međuvremenu riješeni imovinsko-pravni odnosi i o parcelama na kojima je ranije postojalo zasnovano pravo građenja pa su nositelji prava građenja u međuvremenu dakle, izgubili svoje pravo građenja s obzirom da na vrijeme, dakle, u rokovima predviđenim ranijim Odlukama o opterećenju zemljišta pravom građenja i potpisanim ugovorima nisu ishodovali dakle, pravosnažna rješenja o građevinskoj dozvoli ili neke druge, ovaj, urbanističko-tehničke uvjete nisu zadovoljili i time je njima zapravo ukinuto pravo građenja onako kako je predviđeno bilo i ranijim odlukama ali i na način na koji se reguliše i ovom predmetnom odlukom u skladu sa našom Odlukom o uvjetima i načinu pribavljanja i raspolaganja nekretninama i Zakonom o stvarnim pravima. Pena-li se za, naplaćuju u slučaju kašnjenja naplate, dakle, naknade koju su oni dužni plaćati Gradu u mjesečnom iznosu i tada zapravo idu penali i to je regulisano Zakonom o obligacionim odnosima i kao takvo se unosi u ugovor koji potpisuju nosioci prava građenja, a posljedica ne građenja, odnosno ne blagovremenog ishodaovanja Rješenja za građenje ili urbanističke tada je posljedica zapravo ukinuće prava građenja. I s obzirom da raniji nosioci prava građenja nisu ispunili te uvjete a koji su propisani bili i ra-nijim odlukama i ovom odlukom naravno svi ti uvjeti uneseni u ugovor koji su potpisali posljedica toga bila je ukinuće prava građenja. (vijećnik Omer Berbić govori bez uključenog mikrofona op.a.) Ne. Posljedica je dakle, da im se oduzme, evo ukine to pravo građenja i oni više nemaju...Oni za svo vrijeme od momenta potpisivanja ugovora oni plaćaju naknadu. Dakle, mi primamo naknadu i za to vrijeme kako je propisano i ovom odlukom oni su dužni ne znam u roku od 15 dana a najkasnije 30 dana podnijeti zahtjev za urbanističku saglasnost pa nakon toga imaju rok za podnošenje zahtjeva za građevinsku dozvolu itd. za svo to vrijeme oni plaćaju naknadu Gradu. Ali ako ne ispune taj uslov o kojem ste vi govorili posljedica je da je na inicijativu nadležne službe ide zapravo ukinuće prava građenja. Dakle, njima se evo tako da kažem oduzima to zasnovano pravo građenja kako bismo te parcele oslobodili za buduće investitore ukoliko ih bude.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Dobro. Zahvaljujem se. S obzirom da niste potpuno dali, ovaj, odgovor na vijećničko pitanje gospodina Kapidžića vijećnika evo ja, ovaj, dajem sebi za pravo da prozovem i

predstavnik Službe za prostorno uređenje Fahrudina Delića da li on može dati kakvo pojašnjenje, odnosno odgovor na, na pitanje koje je postavio vijećnik Kapidžić s obzirom da smo završili diskusiju ako možete? Ako ne možete onda u pisanoj formi dostavite onaj...Izađite pa, (NATAŠA PERIĆ – Izađite molim vas.) izađite pa recite.

**FAHRUDIN DELIĆ - pomoćnik gradonačelnika za Službu
za prostorno uređenje i zaštitu okoline**

Gospođo predsjedavajuća, dame i gospodo vijećnici ja bih vas zamolio ako mogu dobit da odgovorim na to pitanje u pisanoj formi pošto zahtjeva određenu istoriju tog predmeta?

Ja ću reći samo jednu stvar da u sklopu izrade Regulacionog plana predviđaju se objekti za rušenje i na njima nije moguće...Ti objekti je...zabranjena je gradnja s tim da je dozvoljeno tekuće održavanje tih objekata dok im traje vijek trajanja, odnosno dok se ne steknu uslovi za uklanjanje. Ja ću provjerit ovo što ste vi naveli i dat ću vam tekst, u pisanoj formi odgovor na to pitanje.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Dobro, onaj, hvala. S obzirom da smo završili diskusiju evo Kapidžiću ako može samo minuta da...? (ALEN KAPIDŽIĆ – Može.) Bez diskusije onako samo da kažete šta želite još jednom i nek vam dostave.

ALEN KAPIDŽIĆ

Pa vidte ja sam tražio obrazloženje iz razloga što ne znam po ovom pitanju kako ću sad glasati. Ja sam tražio obrazloženje da, da bi sam sebi ajd da kažemo našao argumente da glasam za ovaj materijal, znači, a ulazimo u tu priču ako ćete mi već pismeno odgovarat, znači, meni je rečeno da se ništa ne može radit bez izmjene Regulacionog plana a očigledno je da u ovom sad momentu na osnovu dobijanja urbanističke saglasnosti već nešto rađeno u, u momentu kad je Regulacioni plan već bio na snazi, znači, a s druge strane sam tražio da parcela do te, da se skloni samo gradski park sa privatnog vlasništva i to ne može, a ovo može. Znači, možemo dobit urbanističku saglasnost da gradimo stambeno-poslovni objekat čak i da dokupimo dio zemljišta od Grada i ja to potpuno prihvatam i to znam da je to zakonski okej, ovaj, ali jel možemo napraviti pošto evo ako je već istekao Regulacioni plan jel možemo sad krenut u izmjenu Regulacionog plana uz neki za-ključak da se ide u izmjenu Regulacionog plana i da se tom čovjeku skloni gradski park?

Pazite mi usvajamo sve regulacione planove i dođe vam ovako pod k.č. broj taj i taj mi ne znamo gdje je. Kad nam dođe Regulacioni plan čak i u onoj skici koju mi dobijemo mi ne znamo gdje je privatno zemljište. Ja možda ne bi u toj varijanti glaso za nešto da se radi ako je to privatno zemljište. Jel vidte mi smo sad čovjeku uzurpirali njegovo zemljište koje je on, za koje je platio. On je to platio i to je privatno zemljište i mi smo mu ne-kad stavili gradski park na to, na njegovo zemljište i čovjek s tom zemljom ne može ništa.

I znate šta je još gore? Što do mene dođu informacije i kažu njemu samo preostaje da on to proda. Ma ko smo mi da određujemo čovjeku hoćel prodat il neće kad je to uzo za svoje privatne pare. Uzo sebi zemlju. Pazite to je malo simptomatično pitanje. Ako mi možete evo odgovorit, ako ne možete vi odgovorite pismeno? Ali ja stvarno bi uzeo onda za pravo da ne, ne glasam za ovo.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik -**

Dobro. Zahvaljujem se, zahvaljujem se. (ALEN KAPIDŽIĆ – Hvala.) Hvala kolega. Ovaj, s obzirom da je bilo diskusija u više tačaka predlažem da glasamo pojedinačno za svaku tačku, ovaj, jer bilo je različitih stavova pa idemo na glasanje. Tačka a).

Glasamo znači prvo o ODLUCI O UTVRĐIVANJU JAVNOG INTERESA ZA IZGRADNJU TRANSFORMATORSKE STANICE KSF6 10(20)/0,4 KILOVATA „PLAVA POLIKLINIKA“ SA PRIKLJUČNIM 10(20) KILOVATA KABLLOM U NASELJU SLAVINOVIĆI U TUZLI. Molim vas da pristupimo glasanju. Konstatujem...Glasanje je okončano.

Konstatujem da je navedena odluka prošla sa 25 glasova, nije bilo protiv niti suzdržanih. Glasamo za odluku

b) ODLUKA O POVJERAVANJU NEKRETNINA U VLASNIŠTVU GRADA TUZLA NA UPRAVLJANJE I KORIŠTENJE JAVNOM KOMUNALNOM PREDUZEĆU „SAOBRAČAJ I KOMUNIKACIJE – TUZLA“ D.O.O. TUZLA. Molim vas bez priče puno. Hvala. Glasanje je okončano.

Konstatujem da je navedena odluka prošla sa,
25 glasova za, nije bilo protiv niti suzdržanih.

Pristupamao glasanju odluke pod rednim brojem

c) ODLUKA O PRODAJI NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA. Molim vas da pristupimo glasanju. Glasanje je okončano.

Konstatujem da je navedena odluka prošla sa 16 glasova, nije bilo protiv i 9 suzdržanih. Prelazimo na glasanje

RJEŠENJA O IMENOVANJU KOMISIJE ZA PROVOĐENJE POSTUPKA PREGOVARANJA ZA PRODAJU NEKRETNINA U VLASNIŠTVU GRADA TUZLE NEPOSREDNOM POGODBOM RADI OBLIKOVANJA GRAĐEVINSKE PARCELE ZA IZGRADNJU KOLEKTIVNOG STAMBENO-POSLOVNOG OBJEKTA. Glasanje okončano.

Konstatujem da je i ova odluka sa še...(NATAŠA PERIĆ – Samo malo. Poništi glasanje.) Poništavamo glasanje. Molim vas ponovo glasamo. Hvala. Glasanje je okončano.

Konstatujem da je pročitano rješenje podržano sa 16 glasova, nije bilo protiv i 8 je bilo suzdržanih vijećnika.

Prelazimo na glasanje ODLUKE O OPTEREĆENJU ZEMLJIŠTA PRAVOM GRAĐENJA NA LOKALITETU POSLOVNE ZONE „KREKA SJEVER“ U TUZLI PUTEM JAVNOG NADMETANJA – LICITACIJE u zagradi (S TEKSTOM JAVNOG OGLASA). Molim vas da pristupimo glasat. Klub HDZ, PDA malo ozbiljnosti. Hvala. Glasanje je okončano.

Konstatujem da je navedena pročitana odluka prošla sa,
23 glasa za, nije bilo protiv uz 1 suzdržan glas.

I glasamo znači o RJEŠENJU O IMENOVANJU KOMISIJE ZA PROVOĐENJE JAVNOG OGLASA O OPTEREĆENJU ZEMLJIŠTA PRAVOM GRAĐENJA NA LOKALITETU POSLOVNE ZONE „KREKA SJEVER“ U TUZLI PUTEM JAVNOG NADMETANJA – LICITACIJE. Molimo vas da pristupimo glasanju. Glasanje je okončano.

Konstatujem da je pročitano rješenje prošlo sa 26 glasova za, nije bilo protiv niti su...(NATAŠA PERIĆ – 24)

24 pardon glasa za, nije bilo protiv niti suzdržanih.

Prelazimo na jedanestu tačku Dnevnog reda:

RAZMATRANJE IZVJEŠTAJA O RJEŠAVANJU UPRAVNIH STVARI U UPRAVNOM POSTUPKU GRADA TUZLE ZA 2023. GODINU

Predlagač: gradonačelnik Grada Tuzla.

Obrađivač: Služba za opću upravu i zajedničke poslove.

Materijal su razmatrali: Komisija za statutarna pitanja i propise i klubovi vijećnika.

Ima li potrebe za uvodnim izlaganjem? (Nema.)

Ima li potrebe da se pročitaju izvještaji komisija? Hvala.

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika. Uvaženi vijećnik Berbić.

OMER BERBIĆ

Fala ljepo. Vrlo mi olako svatimo ovaj materijal O RJEŠAVANJU UPRAVNIH STVARI U UPRAVNOM POSTUPKU GRADA TUZLE a vrlo bitne informacije dobijamo iz njega. Na primjer činjenica evo da je na kraju 2023. ostalo neriješeno 10.648 predmeta od čega samo za 4.974 nije isteklo rok je činjenica koju zaista treba pomno svatiti i mi smo ovdje imali zaključke i zadnje dvije, tri godine oko ovih stvari, međutim ništa se nije ovdje dešavalo i ja mislim da bi se ozbiljno trebalo razmisliti, odnosno da bi gradonačelnik ozbiljno trebao razmisliti na koji način da se ovo riješi i molim vas da ne pričate predsjedavajući gore, ometate. Hvala ljepo. (NATAŠA PERIĆ – Prihvatam.) Zezam se malo. (ĆERIM RASTODER – Dobro. Zahvaljujem, zahvaljujem se Berbiću.) Zezam se malo. Vidte vrlo je ovo bitna tema i mislim da je nešto što bi se trebalo možda malo ozbiljnije svatiti pa da se proba riješiti nekim ugovorima na određeno za ove Službe koje su očigledno podkapacitirane jer očigledno da neke Službe imaju ljude koji ništa ne rade il jako malo rade. Jer ovo je jako veliki broj neriješenih predmeta i ovo se skuplja vjerovatno zadnjih deset-petnest godina i vidim da je ovdje veliki broj predmeta radi Odluke Vlade Kantona oko legalizacije al to opet na neki način ne daje nama pravo da mi zatvorimo jedno oko ili, ili dva oka da imamo preko 5000 predmeta za koje je rok istekao da se riješe a nismo ih riješili kao Gradska uprava. Iz tog razloga želio bi da evo dobijem pismeno ne mora se us...ne mora se danas na to odgovarati. Ali evo pismeno da mi se dostavi da li je u 2023. ili 2022. godini izrečena i ti...da li je izrečena i jedna opomena nekom od radnika u Gradskoj upravi i da li je neko dobio otkaz radi neispunjavanja svojih radnih obaveza u zadnje dvije godine u Gradskoj upravo? Jer jako je veliki broj predmeta neriješenih. Ovo se može desiti samo ukoliko već dugo vrijeme imamo jednu vrstu stagnacije, odnosno jednu vrstu ne, ne rješavanja ovih predmeta. Sad da ne ulazimo od, od, od službe do službe al mislim da je, da je jako bitno da se o ovom porazgovara i da se zaposli ako to treba pedeset, sto ljudi na određeno vrijeme u službama koje su podkapacitirane i da to riješimo, ovaj, na, na, za godinu il dvije i da onda više nemamo problema sa, sa ovim konkretno, ovim konkretno ciframa jer ove cifre su poražavajuće. Fala ljepo.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Dobro. Zahvaljujem se kolegi Berbiću i molim predstavnike Službi da u pisanoj formi dostave, dostave odgovor i imamo ovdje zaključaka par jel tako?

Ima li još diskutacija?

Ako nema s ovim smo zaključili diskusiju i vijećnika.

Prije nego što pređemo na glasanje čitat ćemo...(SLAĐANA AKRAJINA – Prvo izvještaj. Prvo izvještaj.) (vijećnik Omer Berbić govori bez uključenog mikrofona op.a.) Odustajete. Dobro.

OMER BERBIĆ

Odustajem od zaključka. (ĆERIM RASTODER - Dobro.) A nek mi se dostavi pismeno samo molim da odgovor jel to je više pitanje nego zaključak. Svejedno mi je hajd kako god samo da...(SLAĐANA KRAJINA – Pročitat ćemo ipak zaključak.) Može pročitajte hajde. (SLAĐANA KRAJINA – Prvo glasate za izvještaj.)

ĆERIM RASTODER - zamjenik predsjedavajućeg Gradskog vijeća Tuzla, - samostalni vijećnik –

Prvo ćemo glasat... (SLAĐANA KRAJINA – Prvo glasate za izvještaj.)

Prelazimo znači na glasanje IZVJEŠTAJA O RJEŠAVANJU UPRAVNIH STVARI U UPRAVNOM POSTUPKU GRADA TUZLE ZA 2023. GODINU. Glasanje je okončano.

Konstatujem da je navedeni izvještaj prošlo sa,
21 glasom za, nije bilo protiv niti suzdržanih.

Molim sekretara da pročita zaključak.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla traži od predlagача i obrađivača materijala da dostave pisane odgovore na pitanja postavljena tokom rasprave o Izvještaju o rješavanju upravnih stvari u upravnom postupku Grada Tuzle za 2023. godinu.

ĆERIM RASTODER - zamjenik predsjedavajućeg Gradskog vijeća Tuzla, - samostalni vijećnik –

Molim vas da se izjasnimo o pročitanoj zaključku. Molim pažnje Delaliću. Glasanje je okončano.

Konstatujem da je pročitani zaključak prošao sa,
21 glasom za, nije bilo protiv niti suzdržanih.

Prelazimo na sljedeću dvanestu tačku Dnevnog reda:

RAZMATRANJE I DONOŠENJE RJEŠENJA O IZMJENI RJEŠENJA O IMENOVANJU KOORDINACIJSKE RADNE GRUPE ZA IZRADU PROGRAMA KAPITALNIH INVESTICIJA GRADA TUZLA

Obrađivač: Služba za komunalne poslove, izgradnju i poslove mjesnih zajednica.

Materijal su razmatrali: Komisija za statutarna pitanja i propise, Komisija za komunalne poslove i pitanja mjesnih zajednica, Komisija za izbor i imenovanja i klubovi vijećnika.

Ima li potrebe da se da uvodno izlaganje?

Ima li potrebe da se pročitaju izvještaji komisija? Nema.

Otvaram raspravu klubova vijećnika. Hvala.

Zatvaram raspravu klubova vijećnika.

Otvaram raspravu vijećnika.

Zahvaljujem se i zatvaram raspravu klubova vijećnika.

Stavljam na izjašnjenje RJEŠENJE O IZMJENI RJEŠENJA O IMENOVANJU KOORDINACIJSKE RADNE GRUPE ZA IZRADU PROGRAMA KAPITALNIH INVESTICIJA GRADA TUZLA. Glasanje je okončano.

Konstatujem da je navedeno rješenje prošlo sa,
21 glasom za, nije bilo protiv niti suzdržanih.

Prelazimo na tačku trinest Dnevnog reda:

RAZMATRANJE INICIJATIVE ZA DONOŠENJE DEKLARACIJE O OSUDI NASILJA U GAZI.

Predlagač: Kolegij Gradskog vijeća Tuzla, na vijećničku inicijativu vijećnika Senada Mehmedinovića.

Materijal su razmatrali: klubovi vijećnika.

Ima li potrebe za uvodno izlaganje? (vijećnik Selma Čatibušić govori bez uključenog mikrofona op.a.) Molim? (SLAĐANA KRAJINA – Da odma pročitamo tekst? Može naravno.)

Ima li potrebe da se čita izvještaj komisija? (Nema.)

Ako nema pozivam sekretara prije nego što pređemo na, na, ovaj, na diskusiju da pročita tekst deklaracije.

SLAĐANA KRAJINA – sekretar Gradskog vijeća Tuzla

PRIJEDLOG TEKSTA DEKLARACIJE

o osudi nasilja u Gazi

Deklaracijom prije svega naglašavamo poštovanje ljudskih života, dostojanstva i prava. Javno izražavamo stav i osuđujemo svaki oblik nasilja koji rezultira gubicima nevinih života u Pojasu Gaze, a naročito među civilnim stanovništvom.

Izražavamo duboku zabrinutost zbog sudbine civila u Gazi. Svaka izgubljena ljudska žrtva predstavlja tragediju i zahtijeva hitne korake prema postizanju mirnog rješenja.

Pozivamo na poštivanje međunarodnog humanitarnog prava kojim se nedužni civili, a posebno djeca moraju zaštititi.

Očekujemo da međunarodne organizacije, kao što je Ujedinjene Nacije dokumentuju stradanja stanovništva, uništenu imovinu, bolnice, škole, domove, te da se utvrde zločinci kojim će se suditi.

Pozivamo međunarodnu zajednicu da kontinuirano pruža humanitarnu pomoć i iskoristi svoj uticaj kako bi se ublažile patnje stanovništva u Gazi, prije svega kroz osiguranje medicinske zaštite, hrane i pitke vode.

Izražavamo dosadašnju podršku humanitarnim organizacijama koje pružaju pomoć narodu Gaze.

Zalažemo se za hitan humanitarni prekid sukoba, te da svi prelazi u Gazi budu prohodni za nesmetan pristup humanitarnoj pomoći.

Posebno ističemo potrebu zaštite djece i ranjivih skupina tokom sukoba. Djeca ne smiju biti izložena traumatičnim iskustvima i gubicima.

Pozivamo sve međunarodne zvaničnike da se konstantno zalažu za zaustavljanje sukoba, kako bi se osigurao mir i stabilnost.

Tekst Deklaracije je razmatrao Kolegij Gradskog vijeća i prihvatio ga je na svojoj sjednici.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Dobro. Hvala sekretaru i evo prije nego što otvorimo raspravu klubova vijećnika dat ću riječ vijećniku koji je predložio ovu inicijativu Senadu Mehmedinoviću. Ako ima potrebe Senade da nešto kažete s obzirom da smo mi ovo razmatrali?

SENAD MEHMEDINOVIĆ

Ima naravno. Prije svega želim se zahvaliti Kolegiju zato što je prihvatio ovaj prijedlog Deklaracije i mislim da je sama tema o Gazi veoma teška i teško je da se iznosi ono što ću ja sad iznijeti.

Ne želim da se podsjećam ali ovom prilikom se moram podsjetiti na stradanja koja su bila u ratu u Bosni i Hercegovini da bismo mi razumjeli i razumijemo ono što se dešava nažalost trenutno narodu Gaze. Opsada Sarajeva govorim dakle, o zločinima i genocidima koji su bili u našoj zemlji. Opsada Sarajeva 11.541 stradalih od toga 1.601 dijete. Najmračniji dio u Bosni i Hercegovini je genocid u Srebrenici 8.372 stradale osobe najveća ljudska tragedija. Prijedor 5.209 stradalih. Zvornik 2.700 stradalih. Foča 1.900 stradalih. Višegrad 1.700. Bijeljina 500. Travnik 224 i Zločin nad tuzlanskom mladošću sedamdesetjedan devedesetprva-devedesetpeta i ono što se dešavalo nama tih godina u nekoliko par mjeseci se trenutno dešava u Gazi. Dakle, ovo je počelo od oktobra 2023. godine i trenutno imamo situaciju prema podacima UN-a, dakle, provjereni podaci da je preko 26.000 stradalih od toga je veliki broj djece. Zamislite da mi živimo na prostoru Lukavca koji ima 320 metara kvadratnih površine i da tu imamo preko 2 miliona stanovnika koliko je to u Gazi, razlika je samo 30 metara kvadratnih. Od 36 bolnica na tom malom prostoru samo su dvije bolnice potpuno funkcionalne. Od 72 Doma zdravlja samo ih je 18 funkcionalno. Nemoguće je dostaviti isporuku niti lijekova niti gorivo. I kada sam razgovarao sa određenim pravnicima rekli su mi da se sa aspekta međunarodnog prava ovo sve može smatrati ratnim zločinom, a o tome ne možemo mi pričati o tome će pričati institucije koje trebaju da pričaju.

Shodno svemu ovome navedenom ja sam došao na ideju da predložimo ovu Deklaraciju i možda je ova Deklaracija samo jedan kap vode u okeanu ali je poruka i moralna da se zna na čijoj smo mi strani. Hvala ljepo.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Zahvaljujem se vijećniku Mehmedinoviću.
Otvaram raspravu klubova vijećnika. Hvala.
Zatvaram raspravu klubova vijećnika.
Otvaram raspravu vijećnika. Zahvaljujem se.
Zatvaram raspravu vijećnika.

Predlažem da se izjasnimo O TEKSTU DEKLARACIJE O NASILJU U GAZI. Glasanje je okončano.

Konstatujem da je sa 21 glasom za, nije bilo suzdržanih ni protiv da je USVOJEN PRIJEDLOG TEKSTA DEKLARACIJE O OSUDI NASILJA U GAZI.

Prelazimo na tačku četrnest:

RAZMATRANJE IZVJEŠTAJA KOMISIJE ZA IZBOR I IMENOVANJA

SLAĐANA KRAJINA – sekretar Gradskog vijeća Tuzla

Pa nije ovdje bilo prijedloga za izmjene u Komisijama u radnim tijelima. Ono što je Komisija razmatrala to ste već glasali u okviru ovih tačaka rješenja jeste pa da pređemo na sledeću.

**ĆERIM RASTODER - zamjenik predsjedavajućeg
Gradskog vijeća Tuzla,
- samostalni vijećnik –**

Prelazimo znači na tačku petnest:

TEKUĆA PITANJA

Obavještenje Službe za prostorno uređenje i zaštitu okoline o razlozima prolongiranja izrade Izvještaja o stanju u prostoru.

Obrađivač: Služba za prostorno uređenje i zaštitu okoline.

Da li ima potrebe da se čita izvještaji? Otvaram...Ako ne hvala.

Otvaram raspravu klubova vijećnika.

Zahvaljujem se i zatvaram raspravu klubova vijećnika.

Otvaram raspravu vijećnika. Zahvaljujem se.

Zatvaram raspravu vijećnika.

Konstatujem znači, da je GRADSKO VIJEĆE PRIMILO K ZNANJU OBAVJEŠTENJE SLUŽBE ZA PROSTORNO UREĐENJE I ZAŠTITU OKOLINE O RAZLOZIMA PROLONGIRANJA IZRADE IZVJEŠTAJA O STANJU U PROSTORU.

Pozivam sekretara Gradskog vijeća da pročita zaključke ako ima? (SLAĐANA KRAJINA – Nema, nema.) Nije ih bilo.

I na kraju svim građanima Bosne i Hercegovine u svoje ime, kao i u ime svih vijećnika Gradskog vijeća Tuzla upućujem srdačne čestitke povodom 1. marta, Dana nezavisnosti Bosne i Hercegovine. Dobili smo pozivnice za petak za manifestaciju pa pozivam vas da se odazovemo na tu aktivnost.

Zahvaljujem se vijećnicima, predlagačima i obrađivačima materijala i zaključujem 36. redovnu sjednicu Gradskog vijeća Tuzla. Hvala.

(S obzirom da je Dnevni red iscrpljen i 36. redovna sjednica Gradskog vijeća Tuzla zaključena ista je završena u 14:38 sati.)

STENOGRAM SAČINILI:

Selma Šehić

Jasminka Delalić

P R E D S J E D A V A J U Ć I

Nataša Perić, prof. s.r.